

Namo tassa bhagavato arahato sammāsambuddhassa

Khuddakanikāye

Itivuttakapāḷi

1. Ekakanipāto

1. Paṭhamavaggo

1. Lobhasuttaṃ

1. Vuttañhettaṃ bhagavatā, vuttamarahatāti me suttaṃ –

“Ekadhammaṃ, bhikkhave, pajahatha; ahaṃ vo pāṭibhogo anāgāmitāya. Katammaṃ ekadhammaṃ? Lobhaṃ, bhikkhave, ekadhammaṃ pajahatha; ahaṃ vo pāṭibhogo anāgāmitāyā”ti. Etamatthaṃ bhagavā avoca. Tatthettaṃ iti vuccati –

“Yena lobhena luddhāse, sattā gacchanti duggatiṃ;
Tattha lobhaṃ sammadaññāya, pajahanti vipassino;
Pahāya na punāyanti, imaṃ lokaṃ kudācana”nti.

Ayampi attho vutto bhagavatā, iti me sutanti. Paṭhamam.

2. Dosasuttaṃ

2. Vuttañhettaṃ bhagavatā, vuttamarahatāti me suttaṃ –

“Ekadhammaṃ, bhikkhave, pajahatha; ahaṃ vo pāṭibhogo anāgāmitāya. Katammaṃ ekadhammaṃ? Dosaṃ, bhikkhave, ekadhammaṃ pajahatha; ahaṃ vo pāṭibhogo anāgāmitāyā”ti. Etamatthaṃ bhagavā avoca. Tatthettaṃ iti vuccati –

“Yena dosena duṭṭhāse, sattā gacchanti duggatiṃ;
Tattha dosaṃ sammadaññāya, pajahanti vipassino;
Pahāya na punāyanti, imaṃ lokaṃ kudācana”nti.

Ayampi attho vutto bhagavatā, iti me sutanti. Dutiyam.

3. Mohasuttaṃ

3. Vuttañhettaṃ bhagavatā, vuttamarahatāti me suttaṃ –

“Ekadhammaṃ, bhikkhave, pajahatha; ahaṃ vo pāṭibhogo anāgāmitāya. Katammaṃ ekadhammaṃ? Mohaṃ, bhikkhave, ekadhammaṃ pajahatha; ahaṃ vo pāṭibhogo anāgāmitāyā”ti. Etamatthaṃ bhagavā avoca. Tatthettaṃ iti vuccati –

“Yena mohena mūḷhāse, sattā gacchanti duggatiṃ;
Tattha mohaṃ sammadaññāya, pajahanti vipassino;

Pahāya na punāyanti, imaṃ lokam kudācana’’nti.

Ayampi attho vutto bhagavatā, iti me sutanti. Tatiyaṃ.

4. Kodhasuttaṃ

4. Vuttañhetam bhagavatā, vuttamarahatāti me sutam –

‘‘Ekadhammaṃ, bhikkhave, pajahatha; ahaṃ vo pāṭibhogo anāgāmitāya. Katammaṃ ekadhammaṃ? Kodham, bhikkhave, ekadhammaṃ pajahatha; ahaṃ vo pāṭibhogo anāgāmitāyā’’ti. Etamattham bhagavā avoca. Tatthetam iti vuccati –

‘‘Yena kodhena kuddhāse, sattā gacchanti duggatiṃ;
Taṃ kodham sammadaññāya, pajahanti vipassino;
Pahāya na punāyanti, imaṃ lokam kudācana’’nti.

Ayampi attho vutto bhagavatā, iti me sutanti. Catuttham.

5. Makkhasuttaṃ

5. Vuttañhetam bhagavatā, vuttamarahatāti me sutam –

‘‘Ekadhammaṃ, bhikkhave, pajahatha; ahaṃ vo pāṭibhogo anāgāmitāya. Katammaṃ ekadhammaṃ? Makkham, bhikkhave, ekadhammaṃ pajahatha; ahaṃ vo pāṭibhogo anāgāmitāyā’’ti. Etamattham bhagavā avoca. Tatthetam iti vuccati –

‘‘Yena makkhena makkhāse [makkhitāse (syā.)], sattā gacchanti duggatiṃ;
Taṃ makkham sammadaññāya, pajahanti vipassino;
Pahāya na punāyanti, imaṃ lokam kudācana’’nti.

Ayampi attho vutto bhagavatā, iti me sutanti. Pañcamaṃ.

6. Mānasuttaṃ

6. Vuttañhetam bhagavatā, vuttamarahatāti me sutam –

‘‘Ekadhammaṃ, bhikkhave, pajahatha; ahaṃ vo pāṭibhogo anāgāmitāya. Katammaṃ ekadhammaṃ? Mānam, bhikkhave, ekadhammaṃ pajahatha; ahaṃ vo pāṭibhogo anāgāmitāyā’’ti. Etamattham bhagavā avoca. Tatthetam iti vuccati –

‘‘Yena mānena mattāse, sattā gacchanti duggatiṃ;
Taṃ mānam sammadaññāya, pajahanti vipassino;
Pahāya na punāyanti, imaṃ lokam kudācana’’nti.

Ayampi attho vutto bhagavatā, iti me sutanti. Chaṭṭham.

7. Sabbapariññāsuttaṃ

7. Vuttañhetam bhagavatā, vuttamarahatāti me sutam –

“Sabbam, bhikkhave, anabhijānaṃ aparijānaṃ tattha cittaṃ avirājayam appajahaṃ abhabbo dukkhakkhayāya. Sabbañca kho, bhikkhave, abhijānaṃ parijānaṃ tattha cittaṃ virājayam pajahaṃ bhabbo dukkhakkhayāyā”ti. Etamatthaṃ bhagavā avoca. Tatthetaṃ iti vuccati –

“Yo sabbam sabbato ñatvā, sabbatthesu na rajjati;
Sa ve sabbapariññā [sabbam pariññā (syā. pī.)] so, sabbadukkhamupaccagā”ti [sabbam dukkham upaccagāti (syā.), sabbadukkham upaccagāti (pī. aṭṭha.)].

Ayampi attho vutto bhagavatā, iti me sutanti. Sattamaṃ.

8. Mānapariññāsuttaṃ

8. Vuttañhetam bhagavatā, vuttamarahatāti me sutam –

“Mānaṃ, bhikkhave, anabhijānaṃ aparijānaṃ tattha cittaṃ avirājayam appajahaṃ abhabbo dukkhakkhayāya. Mānañca kho, bhikkhave, abhijānaṃ parijānaṃ tattha cittaṃ virājayam pajahaṃ bhabbo dukkhakkhayāyā”ti. Etamatthaṃ bhagavā avoca. Tatthetaṃ iti vuccati –

“Mānupetā ayaṃ pajā, mānaganthā bhava ratā;
Mānaṃ aparijānantā, āgantāro punabbhavaṃ.

“Ye ca mānaṃ pahantvāna, vimuttā mānasaṅkhaye;
Te mānaganthābhibhuno, sabbadukkhamupaccagu”nti [sabbadukkham upaccagunti (pī.), sabbam dukkham upaccagunti (aṭṭhakathā)].

Ayampi attho vutto bhagavatā, iti me sutanti. Aṭṭhamaṃ.

9. Lobhapariññāsuttaṃ

9. Vuttañhetam bhagavatā, vuttamarahatāti me sutam –

“Lobham, bhikkhave, anabhijānaṃ aparijānaṃ tattha cittaṃ avirājayam appajahaṃ abhabbo dukkhakkhayāya. Lobhañca kho, bhikkhave, abhijānaṃ parijānaṃ tattha cittaṃ virājayam pajahaṃ bhabbo dukkhakkhayāyā”ti. Etamatthaṃ bhagavā avoca. Tatthetaṃ iti vuccati –

“Yena lobhena luddhāse, sattā gacchanti duggatiṃ;
Taṃ lobham sammadaññāya, pajahanti vipassino;
Pahāya na punāyanti, imaṃ lokam kudācana”nti.

Ayampi attho vutto bhagavatā, iti me sutanti. Navamaṃ.

10. Dosapariññāsuttaṃ

10. Vuttañhetam bhagavatā, vuttamarahatāti me sutam –

“Doṣam, bhikkhave, anabhijānaṃ aparijānaṃ tattha cittaṃ avirājayam appajahaṃ abhabbo dukkhakkhayāya. Doṣañca kho, bhikkhave, abhijānaṃ parijānaṃ tattha cittaṃ virājayam pajahaṃ bhabbo dukkhakkhayāyā”ti. Etamatthaṃ bhagavā avoca. Tatthetaṃ iti vuccati –

“Yena dosena duṭṭhāse, sattā gacchanti duggatiṃ;

Taṃ dosaṃ sammadaññāya, pajahanti vipassino;
Pahāya na punāyanti, imaṃ lokam kudācana’’nti.

Ayampi attho vutto bhagavatā, iti me sutanti. Dasamaṃ.

Paṭhamo vaggo niṭṭhito.

Tassuddānaṃ –

Rāgadosā atha moho, kodhamakkhā mānaṃ sabbaṃ;
Mānato rāgadosā puna dve, pakāsītā vaggamāhu paṭhamanti.

2. Dutiyavaggo

1. Mohapariññāsuttaṃ

11. Vuttañhetam bhagavatā, vuttamarahatāti me sutam –

‘‘Moḥaṃ, bhikkhave, anabhijānaṃ aparijānaṃ tattha cittaṃ avirājayaṃ appajahaṃ abhabbo dukkhakkhayāya. Mohañca kho, bhikkhave, abhijānaṃ parijānaṃ tattha cittaṃ virājayaṃ pajahaṃ bhabbo dukkhakkhayāya’’ti. Etamatthaṃ bhagavā avoca. Tatthetaṃ iti vuccati –

‘‘Yena mohena mūlhāse, sattā gacchanti duggatiṃ;
Taṃ moḥaṃ sammadaññāya, pajahanti vipassino;
Pahāya na punāyanti, imaṃ lokam kudācana’’nti.

Ayampi attho vutto bhagavatā, iti me sutanti. Paṭhamaṃ.

2. Kodhapariññāsuttaṃ

12. Vuttañhetam bhagavatā, vuttamarahatāti me sutam –

‘‘Kodhaṃ, bhikkhave, anabhijānaṃ aparijānaṃ tattha cittaṃ avirājayaṃ appajahaṃ abhabbo dukkhakkhayāya. Kodhañca kho, bhikkhave, abhijānaṃ parijānaṃ tattha cittaṃ virājayaṃ pajahaṃ bhabbo dukkhakkhayāya’’ti. Etamatthaṃ bhagavā avoca. Tatthetaṃ iti vuccati –

‘‘Yena kodhena kuddhāse, sattā gacchanti duggatiṃ;
Taṃ kodhaṃ sammadaññāya, pajahanti vipassino;
Pahāya na punāyanti, imaṃ lokam kudācana’’nti.

Ayampi attho vutto bhagavatā, iti me sutanti. Dutiyam.

3. Makkhapariññāsuttaṃ

13. Vuttañhetam bhagavatā, vuttamarahatāti me sutam –

‘‘Makkaṃ, bhikkhave, anabhijānaṃ aparijānaṃ tattha cittaṃ avirājayaṃ appajahaṃ abhabbo dukkhakkhayāya. Makkañca kho, bhikkhave, abhijānaṃ parijānaṃ tattha cittaṃ virājayaṃ pajahaṃ bhabbo dukkhakkhayāya’’ti. Etamatthaṃ bhagavā avoca. Tatthetaṃ iti vuccati –

“Yena makkhena makkhāse, sattā gacchanti duggatim;
Taṃ makkhaṃ sammadaññāya, pajahanti vipassino;
Pahāya na punāyanti, imaṃ lokaṃ kudācana”nti.

Ayampi attho vutto bhagavatā, iti me sutanti. Tatiyaṃ.

4. Avijjānīvaraṇasuttaṃ

14. Vuttañhettaṃ bhagavatā, vuttamarahatāti me suttaṃ –

“Nāhaṃ, bhikkhave, aññaṃ ekañīvaraṇampi samanupassāmi yena [yenevaṃ (?)] nīvaraṇena nivutā pajā dīgharattaṃ sandhāvanti saṃsaranti yathayidaṃ, bhikkhave, avijjānīvaraṇaṃ [avijjānīvaraṇena (?)]. Avijjānīvaraṇena hi, bhikkhave, nivutā pajā dīgharattaṃ sandhāvanti saṃsaranti”ti. Etamatthaṃ bhagavā avoca. Tatthettaṃ iti vuccati –

“Natthañño ekadhammopi, yenevaṃ [yeneva (sī. pī. ka.)] nivutā pajā;
Saṃsaranti ahorattaṃ, yathā mohena āvutā.

“Ye ca mohaṃ pahantvāna, tamokkhandhaṃ [tamokkhandhaṃ (sī. syā. pī.)] padālayuṃ;
Na te puna saṃsaranti, hetu tesāṃ na vijjatī”ti.

Ayampi attho vutto bhagavatā, iti me sutanti. Catutthaṃ.

5. Taṇhāsamyojanasuttaṃ

15. Vuttañhettaṃ bhagavatā, vuttamarahatāti me suttaṃ –

“Nāhaṃ, bhikkhave, aññaṃ ekasamyojanampi samanupassāmi yena [yenevaṃ (syā.)] samyojanena samyuttā sattā dīgharattaṃ sandhāvanti saṃsaranti yathayidaṃ, bhikkhave, taṇhāsamyojanaṃ [taṇhāsamyojanena (?)]. Taṇhāsamyojanena hi, bhikkhave, samyuttā sattā dīgharattaṃ sandhāvanti saṃsaranti”ti. Etamatthaṃ bhagavā avoca. Tatthettaṃ iti vuccati –

“Taṇhādutiyo puriso, dīghamaddhāna saṃsaraṃ;
Itthabhāvaññathābhāvaṃ [itthambhāvaññathābhāvaṃ (syā.)], saṃsāraṃ nātivattati.

“Etamādīnavaṃ [evamādīnavaṃ (sī. pī. ka.)] ñatvā, taṇhaṃ [taṇhā (sī. ka.)] dukkhassa sambhavaṃ;
Vītataṇho anādāno, sato bhikkhu paribbaje”ti.

Ayampi attho vutto bhagavatā, iti me sutanti. Pañcamaṃ.

6. Paṭhamasekhasuttaṃ

16. Vuttañhettaṃ bhagavatā, vuttamarahatāti me suttaṃ –

“Sekhassa, bhikkhave, bhikkhuno appattamānasassa anuttaraṃ yogakkhemaṃ patthayamānassa viharato ajjhattikaṃ aṅganti karitvā nāññaṃ ekaṅgampi samanupassāmi yaṃ evaṃ bahūpakāraṃ yathayidaṃ, bhikkhave, yoniso manasikāro. Yoniso, bhikkhave, bhikkhu manasi karonto akusalaṃ pajahati, kusalaṃ bhāvetī”ti. Etamatthaṃ bhagavā avoca. Tatthettaṃ iti vuccati –

“Yoniso manasikāro, dhammo sekhasa bhikkhuno;
Natthañño evaṃ bahukāro, uttamatthassa pattiyā;
Yoniso padahaṃ bhikkhu, khayaṃ dukkhassa pāpuṇe”ti.

Ayampi attho vutto bhagavatā, iti me sutanti. Chaṭṭhaṃ.

7. Dutiyasekhasuttaṃ

17. Vuttañhettaṃ bhagavatā, vuttamarahatāti me suttaṃ –

“Sekhasa, bhikkhave, bhikkhuno appattamānasassa anuttaraṃ yogakkhemaṃ patthayamānassa viharato bāhiraṃ aṅganti karitvā nāññaṃ ekaṅgampi samanupassāmi yaṃ evaṃ bahūpakāraṃ yathayidaṃ, bhikkhave, kalyāṇamittatā. Kalyāṇamitto, bhikkhave, bhikkhu akusalaṃ pajahati, kusalaṃ bhāveti”ti. Etamatthaṃ bhagavā avoca. Tatthetaṃ iti vuccati –

“Kalyāṇamitto yo bhikkhu, sappatisso sagāraṃ;
Karaṃ mittānaṃ vacanaṃ, sampajāno patissato;
Pāpuṇe anupubbena, sabbasaṃyojanakkhaya”nti.

Ayampi attho vutto bhagavatā, iti me sutanti. Sattamaṃ.

8. Saṅghabhedasuttaṃ

18. Vuttañhettaṃ bhagavatā, vuttamarahatāti me suttaṃ –

“Ekadhammo, bhikkhave, loke uppajjamāno uppajjati bahujaṇāhitāya bahujaṇāsukhāya bahuno janassa anattāya ahitāya dukkhāya devamanussānaṃ. Katamo ekadhammo? Saṅghabhedo. Saṅghe kho pana, bhikkhave, bhinne aññamaññaṃ bhaṇḍanāni ceva honti, aññamaññaṃ paribhāsā ca honti, aññamaññaṃ parikkhepā ca honti, aññamaññaṃ pariccajanā ca honti. Tattha appasannā ceva nappasīdanti, pasannānañca ekaccānaṃ aññathattaṃ hoti”ti. Etamatthaṃ bhagavā avoca. Tatthetaṃ iti vuccati –

“Āpāyiko nerayiko, kappatṭho saṅghabhedako;
Vaggārāmo adhammatṭho, yogakkhemā padhaṃsati [[yogakkhemato dhaṃsati \(syā. pī.\)](#),
[yogakkhemā vimāṃsati \(sī. ka.\)](#)];
Saṅghaṃ samaggaṃ bhetvāna [[bhivāna \(sī. ka.\)](#), [bhinditvā \(cūḷava. 354; a. ni. 10.39\)](#)],
kappaṃ nirayamhi paccatī”ti.

Ayampi attho vutto bhagavatā, iti me sutanti. Aṭṭhamaṃ.

9. Saṅghasāmaggīsuttaṃ

19. Vuttañhettaṃ bhagavatā, vuttamarahatāti me suttaṃ –

“Ekadhammo, bhikkhave, loke uppajjamāno uppajjati bahujaṇāhitāya bahujaṇāsukhāya bahuno janassa atthāya hitāya sukhāya devamanussānaṃ. Katamo ekadhammo? Saṅghasāmaggī. Saṅghe kho pana, bhikkhave, samagge na ceva aññamaññaṃ bhaṇḍanāni honti, na ca aññamaññaṃ paribhāsā honti, na ca aññamaññaṃ parikkhepā honti, na ca aññamaññaṃ pariccajanā honti. Tattha appasannā ceva pasīdanti, pasannānañca bhiyyobhāvo hoti”ti. Etamatthaṃ bhagavā avoca. Tatthetaṃ iti vuccati –

“Sukhā saṅghassa sāmaggī, samaggānañcanuggaho;
Samaggarato dhammaṭṭho, yogakkhemā na dhamṣati;
Saṅghaṃ samaggaṃ katvāna, kappam saggamhi modatī”’ti.

Ayampi attho vutto bhagavatā, iti me sutanti. Navamaṃ.

10. Paduṭṭhacittasuttaṃ

20. Vuttañhetam bhagavatā, vuttamarahatāti me sutam –

“Idhāhaṃ, bhikkhave, ekaccaṃ puggalaṃ paduṭṭhacittam evaṃ cetasā ceto paricca pajānāmi –
‘imamhi cāyaṃ samaye puggalo kālaṅkareyya yathābhatam nikkhitto evaṃ niraye’. Tam kissa hetu?
Cittam hissa, bhikkhave, paduṭṭham. Cetopadosahetu kho pana, bhikkhave, evamidhekacce sattā kāyassa
bhedaṃ param maraṇā apāyaṃ duggatiṃ vinipātam nirayaṃ upapajjantī”’ti. Etamattham bhagavā avoca.
Tatthetam iti vuccati –

“Paduṭṭhacittam ñatvāna, ekaccaṃ idha puggalaṃ;
Etamatthañca byākāsi, buddho bhikkhūna santike.

“Imamhi cāyaṃ samaye, kālam kayirātha puggalo;
Nirayaṃ upapajjeyya, cittam hissa padūsitam.

“Yathā haritvā nikkhipeyya, evameva tathāvidho;
Cetopadosahetu hi, sattā gacchanti duggati”’nti.

Ayampi attho vutto bhagavatā, iti me sutanti. Dasamaṃ.

Dutiyo vaggo niṭṭhito.

Tassuddānam –

Moho kodho atha makkho, vijjā taṇhā sekhaduve ca;
Bhedo sāmaggipuggalo [mohakodha atha makkhāgato, mūhā kāmasekkhaduve;
bhedaśāmaggapuggalo ca (sī. ka.) mohakodhā atha makkho mohakāmā sekkhā duve;
bhedamodā puggalo ca (syā. pī.)], vaggamāhu dutiyanti vuccatīti.

3. Tatiyavaggo

1. Pasannacittasuttaṃ

21. Vuttañhetam bhagavatā, vuttamarahatāti me sutam –

“Idhāhaṃ, bhikkhave, ekaccaṃ puggalaṃ pasannacittam evaṃ cetasā ceto paricca pajānāmi –
‘imamhi cāyaṃ samaye puggalo kālam kareyya yathābhatam nikkhitto evaṃ sagge’. Tam kissa hetu?
Cittam hissa, bhikkhave, pasannaṃ. Cetopasādahetu kho pana, bhikkhave, evamidhekacce sattā kāyassa
bhedaṃ param maraṇā sugatiṃ saggam lokam upapajjantī”’ti. Etamattham bhagavā avoca. Tatthetam iti
vuccati –

“Pasannacittam ñatvāna, ekaccaṃ idha puggalaṃ;
Etamatthañca byākāsi, buddho bhikkhūna santike.

“Imamhi cāyaṃ samaye, kālaṃ kayirātha puggalo;
Sugatiṃ upapajjeyya, cittaṃ hissa pasāditaṃ.

“Yathā haritvā nikkhipeyya, evameva tathāvidho;
Cetopasādahetu hi, sattā gacchanti sugati”nti.

Ayampi attho vutto bhagavatā, iti me sutanti. Paṭhamam.

2. Mettasuttaṃ

22. Vuttañhetam bhagavatā, vuttamarahatāti me sutam –

“Mā, bhikkhave, puññānaṃ bhāyittha. Sukhassetam, bhikkhave, adhivacanaṃ iṭṭhassa kantassa piyassa manāpassa yadidaṃ puññāni [puññānanti, (a. ni. 7.62)]. Abhijānāmi kho pañāhaṃ, bhikkhave, dīgharattaṃ katānaṃ puññānaṃ iṭṭhaṃ kantaṃ piyaṃ manāpaṃ vipākaṃ paccañubhūtaṃ. Satta vassāni mettacittaṃ bhāvetvā satta saṃvaṭṭavivaṭṭakappe nayimaṃ lokaṃ punarāgamāsiṃ. Saṃvaṭṭamāne sudaṃ, bhikkhave, kappe ābhassarūpago homi; vivaṭṭamāne kappe suññaṃ brahmavimānaṃ upapajjāmi.

“Tatra sudaṃ, bhikkhave, brahmā homi mahābrahmā abhibhū anabhibhūto aññadatthudaso vasavattī. Chattimsakkhattuṃ kho pañāhaṃ, bhikkhave, sakko ahoṣiṃ devānamindo; anekasatakkhattuṃ rājā ahoṣiṃ cakkavattī dhammiko dhammarājā cāturato vijitāvī janapadatthāvariyaṃ appatto sattaratanasamannāgato. Ko pana vādo padesarajjassa!

“Tassa mayhaṃ, bhikkhave, etadahosi – ‘kissa nu kho me idaṃ kamma phalaṃ, kissa kamma vipāko, yenāhaṃ etarahi evaṃmahiddhiko evaṃmahāñubhāvo’ti? Tassa mayhaṃ, bhikkhave, etadahosi – ‘tiṇṇaṃ kho me idaṃ kammānaṃ phalaṃ, tiṇṇaṃ kammānaṃ vipāko, yenāhaṃ etarahi evaṃmahiddhiko evaṃmahāñubhāvoti, seyyathidaṃ [seyyathīdaṃ (sī. syā. kam. pī.)] – dānassa, damassa, saññaṃ assā”ti. Etamatthaṃ bhagavā avoca. Tatthetaṃ iti vuccati –

“Puññaṃ eva so sikkheyya, āyataggaṃ sukhudrayaṃ;
Dānañca samacariyañca, mettacittañca bhāvaye.

“Ete dhamme bhāvayitvā, tayo sukhasamuddaye [sukhasamudraye (sī. aṭṭha.)];
Abyāpajjhaṃ [abyāpajjaṃ (syā. ka.), abyābajjhaṃ (?)] sukhaṃ lokaṃ, pañḍito upapajjati”ti.

Ayampi attho vutto bhagavatā, iti me sutanti. Dutiyam.

3. Ubhayatthasuttaṃ

23. Vuttañhetam bhagavatā, vuttamarahatāti me sutam –

“Ekadhammo, bhikkhave, bhāvito bahulīkato ubho atthe samadhigayha tiṭṭhati – diṭṭhadhammikañceva atthaṃ samparāyikañca. Katamo ekadhammo? Appamādo kusalesu dhammesu. Ayaṃ kho, bhikkhave, ekadhammo bhāvito bahulīkato ubho atthe samadhigayha tiṭṭhati – diṭṭhadhammikañceva atthaṃ samparāyikañcā”ti. Etamatthaṃ bhagavā avoca. Tatthetaṃ iti vuccati –

“Appamādaṃ pasamsanti, puññakiriyāsu pañḍitā;
Appamatto ubho atthe, adhigaṇhāti pañḍito.

“Diṭṭhe dhamme ca yo attho, yo cattho samparāyiko;

Atthābhisamayā dhīro, paṇḍitoti pavuccatī’’ti.

Ayampi attho vutto bhagavatā, iti me sutanti. Tatiyaṃ.

4. Aṭṭhipuñjasuttaṃ

24. Vuttañhettaṃ bhagavatā, vuttamarahatāti me suttaṃ –

‘‘Ekapuggalassa, bhikkhave, kammaṃ sandhāvato saṃsarato siyā evaṃ mahā aṭṭhikaṅkalo aṭṭhipuñjo aṭṭhirāsi yathāyaṃ vepullo pabbato: sace saṃhārako assa, sambhatañca na vinasseyyā’’ti. Etamatthaṃ bhagavā avoca. Tatthettaṃ iti vuccati –

‘‘Ekassekena kappena, puggalassaṭṭhisañcayo;
Siyā pabbatasamo rāsi, iti vuttaṃ mahesinā.

‘‘So kho paṇāyaṃ akkhāto, vepullo pabbato mahā;
Uttaro giṃḥhakūṭassa, magadhānaṃ giribbaje.

‘‘Yato ca ariyasaccāni, sammappaññāya passati;
Dukkhaṃ dukkhasamuppādaṃ, dukkhassa ca atikkamaṃ;
Ariyañcaṭṭhaṅgikaṃ maggaṃ, dukkhūpasamagāminaṃ.

‘‘Sa sattakkhattuṃ paramaṃ, sandhāvitvāna puggalo;
Dukkhasantakaro hoti, sabbasaṃyojanakkhayā’’ti.

Ayampi attho vutto bhagavatā, iti me sutanti. Catutthaṃ.

5. Musāvādasuttaṃ

25. Vuttañhettaṃ bhagavatā, vuttamarahatāti me suttaṃ –

‘‘Ekadhammaṃ atītassa, bhikkhave, purisaṃpuggalassa nāhaṃ tassa kiñci pāpakammaṃ akaraṇīyanti vadāmi. Katamaṃ ekadhammaṃ? Yadidaṃ [yathayidaṃ (sī. syā. ka.), yathāyidaṃ (pī.)] bhikkhave, sampajānamusāvādo’’ti. Etamatthaṃ bhagavā avoca. Tatthettaṃ iti vuccati –

‘‘Ekadhammaṃ atītassa, musāvādissa jantuno;
Vitiṇṇaparalokassa, natthi pāpaṃ akāriya’’nti.

Ayampi attho vutto bhagavatā, iti me sutanti. Pañcamaṃ.

6. Dānasuttaṃ

26. Vuttañhettaṃ bhagavatā, vuttamarahatāti me suttaṃ –

‘‘Evañce, bhikkhave, sattā jāneyyumaṃ dānaṃvibhāgassa vipākaṃ yathāhaṃ jānāmi, na adavā bhuñjeyyumaṃ, na ca nesaṃ maccheramalaṃ cittaṃ pariyādāya tiṭṭheyya. Yopi nesaṃ assa carimo ālopo carimaṃ kabaḷaṃ, tatopi na asaṃvibhajitvā bhuñjeyyumaṃ, sace nesaṃ paṭiggāhakaṃ assu. Yasmā ca kho, bhikkhave, sattā na evaṃ jānanti dānaṃvibhāgassa vipākaṃ yathāhaṃ jānāmi, tasmā adavā bhuñjanti, maccheramalañca nesaṃ cittaṃ pariyādāya tiṭṭhatī’’ti. Etamatthaṃ bhagavā avoca. Tatthettaṃ iti vuccati –

“Evaṃ ce sattā jāneyyūṃ, yathāvuttaṃ mahesinā;
Vipākaṃ saṃvibhāgassa, yathā hoti mahapphalaṃ.

“Vineyya maccheramalaṃ, vippasannena cetasā;
Dajjūṃ kālena ariyesu, yattha dīnaṃ mahapphalaṃ.

“Annañca datvā [datvāna (syā.)] bahuno, dakkhiṇeyyesu dakkhiṇaṃ;
Ito cutā manussattā, saggaṃ gacchanti dāyakā.

“Te ca saggagatā [saggaṃ gatā (sī. pī. ka.)] tатtha, modanti kāmakāmino;
Vipākaṃ saṃvibhāgassa, anubhonti amaccharā”ti.

Ayampi attho vutto bhagavatā, iti me sutanti. Chaṭṭhaṃ.

7. Mettābhāvanāsuttaṃ

27. Vuttañhettaṃ bhagavatā, vuttamarahatāti me suttaṃ –

“Yāni kānici, bhikkhave, opadhikāni puññakiriyavattūni sabbāni tāni mettāya cetovimuttiyā
kalaṃ nāgghanti soḷasiṃ. Mettāyeva tāni cetovimutti adhiggaḥetvā bhāsate ca tapate ca virocanti ca.

“Seyyathāpi, bhikkhave, yā kāci tārarūpānaṃ pabhā sabbā tā candiyā pabhāya kalaṃ nāgghanti
soḷasiṃ, candapabhāyeva tā adhiggaḥetvā bhāsate ca tapate ca virocanti ca; evameva kho, bhikkhave,
yāni kānici opadhikāni puññakiriyavattūni sabbāni tāni mettāya cetovimuttiyā kalaṃ nāgghanti
soḷasiṃ, mettāyeva tāni cetovimutti adhiggaḥetvā bhāsate ca tapate ca virocanti ca.

“Seyyathāpi, bhikkhave, vassānaṃ pacchime māse saradasamaye viddhe vigatavalāhake deve
[nabhe (sī.)] ādicco nabhaṃ abhussakkamāno [abbhuggamamāno (ka. aṭṭha.)] sabbhaṃ ākāsagataṃ
[ākāsaṃ (syā.)] tamagataṃ abhivihacca [abhihacca (syā.)] bhāsate ca tapate ca virocanti ca; evameva kho,
bhikkhave, yāni kānici opadhikāni puññakiriyavattūni sabbāni tāni mettāya cetovimuttiyā kalaṃ
nāgghanti soḷasiṃ, mettāyeva tāni cetovimutti adhiggaḥetvā bhāsate ca tapate ca virocanti ca.

“Seyyathāpi, bhikkhave, rattiyā paccūsasamayaṃ osadhitarakā bhāsate ca tapate ca virocanti ca;
evameva kho, bhikkhave, yāni kānici opadhikāni puññakiriyavattūni sabbāni tāni mettāya
cetovimuttiyā kalaṃ nāgghanti soḷasiṃ, mettāyeva tāni cetovimutti adhiggaḥetvā bhāsate ca tapate ca
virocanti ca”ti. Etamatthaṃ bhagavā avoca. Tatthetaṃ iti vuccati –

“Yo ca mettaṃ bhāvayati, appamāṇaṃ paṭissato;
Tanū [tanu (sī.)] saṃyojanā honti, passato upadhikkhayaṃ.

“Ekampi ce pāṇamaduṭṭhacitto, mettāyati kusalo tena hoti;
Sabbe ca pāṇe manasānukampaṃ, pahūtamariyo pakaroti puññaṃ.

“Ye [yo (sī.)] sattaṇḍaṃ pathaviṃ vijitvā, rājīsayo [rājīsayo (sī.)] yajamānānupariyagā;
Assamedhaṃ purisamedhaṃ, sammāpāsaṃ vājapeyyaṃ niraggaḷaṃ.

“Mettassa cittassa subhāvitassa, kalampi te nānubhavanti soḷasiṃ;
Candappabhā tāragaṇāva sabbe.

“Yo na hanti na ghāteti, na jināti na jāpaye;

Mettaṃso sabbabhūtesu, veraṃ tassa na kenaci'’ti.

Ayampi attho vutto bhagavatā, iti me sutanti. Sattamaṃ.

Tatiyo vaggo niṭṭhito.

Tassuddānaṃ –

Cittaṃ mettaṃ [jhāyī (sī. syā.), jhāyi (pī. ka.)] ubho atthe, puñjaṃ vepullapabbataṃ;
Sampajānamusāvādo, dānañca mettabhāvanā [mettabhāvañca (sī. syā. pī.), mettavācañca
(ka.)].

Sattimāni ca [sattimānidha (sī. ka.)] suttāni, purimāni ca vīsati;
Ekadhammesu suttantā, sattavīsatisaṅgahāti.

Ekakanipāto niṭṭhito.

2. Dukanipāto

1. Paṭhamavaggo

1. Dukkavihārasuttaṃ

28. (Dve dhamme anukkaṭi) [() syāmapotthake natthi] vuttañhettaṃ bhagavatā, vuttamarahatāti me suttaṃ –

“Dvīhi, bhikkhave, dhammehi samannāgato bhikkhu diṭṭheva dhamme dukkhaṃ viharati savighātaṃ saupāyāsaṃ sapariḷāhaṃ; kāyassa bhedaṃ paraṃ maraṇā duggati pāṭikaṅkhā. Katamehi dvīhi? Indriyesu aguttadvārātāya [aguttadvāro (aṭṭha.)] ca, bhojane amattaññutāya [amattaññū (aṭṭha.)] ca. Imehi kho, bhikkhave, dvīhi dhammehi samannāgato bhikkhu diṭṭheva dhamme dukkhaṃ viharati savidhātaṃ saupāyāsaṃ sapariḷāhaṃ; kāyassa bhedaṃ paraṃ maraṇā duggati pāṭikaṅkhā’’ti. Etamatthaṃ bhagavā avoca. Tatthettaṃ iti vuccati –

“Cakkhu sotañca ghānañca, jivhā kāyo tathā mano;
Etāni yassa dvārāni, aguttānidha [aguttāni ca (syā.)] bhikkhuno.

“Bhojanamhi amattaññū, indriyesu asaṃvuto;
Kāyadukkhaṃ cetodukkhaṃ, dukkhaṃ so adhigacchati.

“Ḍayhamānena kāyena, ḍayhamānena cetasā;
Divā vā yadi vā rattiṃ, dukkhaṃ viharati tādiso’’ti.

Ayampi attho vutto bhagavatā, iti me sutanti. Paṭhamaṃ.

2. Sukhavihārasuttaṃ

29. Vuttañhettaṃ bhagavatā, vuttamarahatāti me suttaṃ –

“Dvīhi, bhikkhave, dhammehi samannāgato bhikkhu diṭṭheva dhamme sukhaṃ viharati avighātaṃ anupāyāsaṃ aparīḷāhaṃ; kāyassa bhedaṃ paraṃ maraṇā sugati pāṭikaṅkhā. Katamehi dvīhi? Indriyesu

guttadvāratāya ca, bhojane mattaññutāya ca. Imehi kho, bhikkhave, dvīhi dhammehi samannāgato bhikkhu diṭṭheva dhamme sukhaṃ viharati avighātaṃ anupāyāsaṃ aparilāhaṃ; kāyassa bhedaṃ paraṃ maraṇā sugati paṭikaṅkhā”ti. Etamatthaṃ bhagavā avoca. Tatthetaṃ iti vuccati –

“Cakkhu sotañca ghānañca, jivhā kāyo tathā [atho (sī. syā. ka.)] mano;
Etāni yassa dvārāni, suguttānidha bhikkhuno.

“Bhojanamhi ca mattaññū, indriyesu ca saṃvuto;
Kāyasukhaṃ cetosukhaṃ, sukhaṃ so adhigacchati.

“Aḍayhamānena kāyena, aḍayhamānena cetasā;
Divā vā yadi vā rattiṃ, sukhaṃ viharati tādiso”ti.

Ayampi attho vutto bhagavatā, iti me sutanti. Dutiyaṃ.

3. Tapanīyasuttaṃ

30. Vuttañhettaṃ bhagavatā, vuttamarahatāti me suttaṃ –

“Dveme, bhikkhave, dhammā tapanīyā. Katame dve? Idha, bhikkhave, ekacco akatakalyāṇo hoti, akatakusalo, akatabhīruttāṇo, katapāpo, kataluddo, katakibbisso. So ‘akataṃ me kalyāṇa’ntipi tappati, ‘kataṃ me pāpa’ntipi tappati. Ime kho, bhikkhave, dve dhammā tapanīyā”ti. Etamatthaṃ bhagavā avoca. Tatthetaṃ iti vuccati –

“Kāyaduccaritaṃ katvā, vacīduccaritāni ca;
Manoduccaritaṃ katvā, yañcaññaṃ dosasañhitāṃ.

“Akatvā kusalaṃ kammaṃ, katvānākusalaṃ bahuṃ;
Kāyassa bhedaṃ duppañño, nirayaṃ sopapajjati”ti [nirayaṃ so upapajjati (sī. syā. kaṃ. pī.)].

Ayampi attho vutto bhagavatā, iti me sutanti. Tatiyaṃ.

4. Atapanīyasuttaṃ

31. Vuttañhettaṃ bhagavatā, vuttamarahatāti me suttaṃ –

“Dveme, bhikkhave, dhammā atapanīyā. Katame dve? Idha, bhikkhave, ekacco katakalyāṇo hoti, katakusalo, katabhīruttāṇo, akatapāpo, akataluddo, akatakibbisso. So ‘kataṃ me kalyāṇa’ntipi na tappati, ‘akataṃ me pāpa’ntipi na tappati. Ime kho, bhikkhave, dve dhammā atapanīyā”ti. Etamatthaṃ bhagavā avoca. Tatthetaṃ iti vuccati –

“Kāyaduccaritaṃ hitvā, vacīduccaritāni ca;
Manoduccaritaṃ hitvā, yañcaññaṃ dosasañhitāṃ.

“Akatvākusalaṃ kammaṃ, katvāna kusalaṃ bahuṃ;
Kāyassa bhedaṃ sappañño, saggāṃ so upapajjati”ti.

Ayampi attho vutto bhagavatā, iti me sutanti. Catutthaṃ.

5. Paṭhamasīlasuttaṃ

32. Vuttañhetam bhagavatā, vuttamarahatāti me sutam –

“Dvīhi, bhikkhave, dhammehi samannāgato puggalo yathābhatam nikkhitto evam niraye. Katamehi dvīhi? Pāpakena ca sīlena, pāpikāya ca diṭṭhiyā. Imehi kho, bhikkhave, dvīhi dhammehi samannāgato puggalo yathābhatam nikkhitto evam niraye”ti. Etamattham bhagavā avoca. Tatthetam iti vuccati –

“Pāpakena ca sīlena, pāpikāya ca diṭṭhiyā;
Etehi dvīhi dhammehi, yo samannāgato naro;
Kāyassa bheda dappañño, nirayam sopapajjati”ti.

Ayampi attho vutto bhagavatā, iti me sutanti. Pañcamaṃ.

6. Dutiyasīlasuttam

33. Vuttañhetam bhagavatā, vuttamarahatāti me sutam –

“Dvīhi, bhikkhave, dhammehi samannāgato puggalo yathābhatam nikkhitto evam sagge. Katamehi dvīhi? Bhaddakena ca sīlena, bhaddikāya ca diṭṭhiyā. Imehi kho, bhikkhave, dvīhi dhammehi samannāgato puggalo yathābhatam nikkhitto evam sagge”ti. Etamattham bhagavā avoca. Tatthetam iti vuccati –

“Bhaddakena ca sīlena, bhaddikāya ca diṭṭhiyā;
Etehi dvīhi dhammehi, yo samannāgato naro;
Kāyassa bheda sappañño, saggam so upapajjati”ti.

Ayampi attho vutto bhagavatā, iti me sutanti. Chaṭṭham.

7. Ātāpīsuttam

34. Vuttañhetam bhagavatā, vuttamarahatāti me sutam –

“Anātāpī, bhikkhave, bhikkhu anottāpī [anottappī (bahūsu) aṭṭhakathā passitabbā] abhabbo sambodhāya, abhabbo nibbānāya, abhabbo anuttarassa yogakkhemassa adhigamāya. Ātāpī ca kho, bhikkhave, bhikkhu ottāpī [ottappī (bahūsu)] bhabbo sambodhāya, bhabbo nibbānāya, bhabbo anuttarassa yogakkhemassa adhigamāya”ti. Etamattham bhagavā avoca. Tatthetam iti vuccati –

“Anātāpī anottāpī, kusīto hīnavīriyo;
Yo thīnamiddhabahulo, ahirīko anādarō;
Abhabbo tādiso bhikkhu, phuṭṭhum sambodhimuttamaṃ.

“Yo ca satimā nipako jhāyī, ātāpī ottāpī ca appamatto;
Saṃyojanam jātijarāya chetvā, idheva sambodhimanuttaram phuse”ti.

Ayampi attho vutto bhagavatā, iti me sutanti. Sattamaṃ.

8. Paṭhamanakuhanasuttam

35. Vuttañhetam bhagavatā, vuttamarahatāti me sutam –

“Nayidaṃ, bhikkhave, brahmacariyaṃ vussati janakuhanatthaṃ, na janalapanatthaṃ, na lābhasakkārasilokānisamsatthaṃ, na ‘iti maṃ jano jānātū’ ti. Atha kho idaṃ, bhikkhave, brahmacariyaṃ vussati saṃvaratthañceva pahānatthañcā” ti. Etamatthaṃ bhagavā avoca. Tatthetaṃ iti vuccati –

“Saṃvaratthaṃ pahānatthaṃ, brahmacariyaṃ anītihaṃ;
Adesayi so bhagavā, nibbānogadhagāmināṃ.

“Esa maggo mahattehi [mahantehi (sī. ka.), mahatthehi (syā.)], anuyāto mahesibhi [mahesino (sī. ka.)];
Ye ye taṃ paṭipajjanti, yathā buddhena desitaṃ;
Dukkassantaṃ karissanti, satthusāsanakārino” ti.

Ayampi attho vutto bhagavatā, iti me sutanti. Aṭṭhamāṃ.

9. Dutiyanakuhanasuttaṃ

36. Vuttañhetāṃ bhagavatā, vuttamarahatāti me sutāṃ –

“Nayidaṃ, bhikkhave, brahmacariyaṃ vussati janakuhanatthaṃ, na janalapanatthaṃ, na lābhasakkārasilokānisamsatthaṃ, na ‘iti maṃ jano jānātū’ ti. Atha kho idaṃ, bhikkhave, brahmacariyaṃ vussati abhiññatthañceva pariññatthañcā” ti. Etamatthaṃ bhagavā avoca. Tatthetaṃ iti vuccati –

“Abhiññatthaṃ pariññatthaṃ, brahmacariyaṃ anītihaṃ;
Adesayi so bhagavā, nibbānogadhagāmināṃ.

“Esa maggo mahattehi, anuyāto mahesibhi;
Ye ye taṃ paṭipajjanti, yathā buddhena desitaṃ;
Dukkassantaṃ karissanti, satthusāsanakārino” ti.

Ayampi attho vutto bhagavatā, iti me sutanti. Navamāṃ.

10. Somanassasuttaṃ

37. Vuttañhetāṃ bhagavatā, vuttamarahatāti me sutāṃ –

“Dvīhi, bhikkhave, dhammehi samannāgato bhikkhu diṭṭheva dhamme sukhasomanassabahulo viharati, yoni cassa [yoniso (sī. syā. pī.), yonissa (ka.)] āradhā hoti āsavānaṃ khayāya. Katamehi dvīhi? Saṃvejanīyesu ṭhānesu saṃvejanena, saṃviggassa ca yoniso padhānena. Imehi kho, bhikkhave, dvīhi dhammehi samannāgato bhikkhu diṭṭheva dhamme sukhasomanassabahulo viharati, yoni cassa āradhā hoti āsavānaṃ khayāyā” ti. Etamatthaṃ bhagavā avoca. Tatthetaṃ iti vuccati –

“Saṃvejanīyatṭhānesu [saṃvejanīyesu ṭhānesu (syā. pī.)], saṃvijjetha paṇḍito;
Ātāpī nipako bhikkhu, paññāya samavekkhiya.

“Evaṃ vihārī ātāpī, santavutti anuddhato;
Cetosamathamanyutto, khayāṃ dukkhassa pāpuṇe” ti.

Ayampi attho vutto bhagavatā, iti me sutanti. Dasamāṃ.

Paṭhamo vaggo niṭṭhito.

Tassuddānaṃ –

Dve ca bhikkhū tapanīyā, tapanīyā paratthehi;
Ātāpī [dve pādā (ka.), dve ātāpī (sī.)] nakuhanā dve [na kuhanā ca (sabbattha)], somanassena
te dasāti.

2. Dutiyavaggo

1. Vitakkasuttaṃ

38. Vuttañhettaṃ bhagavatā, vuttamarahatāti me suttaṃ –

“Tathāgataṃ, bhikkhave, arahantaṃ sammāsambuddhaṃ dve vitakkā bahulaṃ samudācaranti –
khemo ca vitakko, paviveko ca [viveko ca (syā.)]. Abyāpajjhārāmo [abyāpajjārāmo (ka.),
abyābajjhārāmo (?)], bhikkhave, tathāgato abyāpajjharato. Tameṇaṃ, bhikkhave, tathāgataṃ
abyāpajjhārāmaṃ abyāpajjharataṃ eseva vitakko bahulaṃ samudācarati – ‘imāyāhaṃ iriyāya na kiñci
byābādhemi tasmaṃ vā thāvaram vā’ ti.

“Pavivekārāmo, bhikkhave, tathāgato pavivekarato. Tameṇaṃ, bhikkhave, tathāgataṃ
pavivekārāmaṃ pavivekarataṃ eseva vitakko bahulaṃ samudācarati – ‘yaṃ akusalaṃ taṃ pahīna’ nti.

“Tasmātiha, bhikkhave, tumhepi abyāpajjhārāmā viharatha abyāpajjharatā. Tesam vo, bhikkhave,
tumhākaṃ abyāpajjhārāmānaṃ viharataṃ abyāpajjharatānaṃ eseva vitakko bahulaṃ samudācarissati –
‘imāya mayaṃ iriyāya na kiñci byābādhema tasmaṃ vā thāvaram vā’ ti.

“Pavivekārāmā, bhikkhave, viharatha pavivekaratā. Tesam vo, bhikkhave, tumhākaṃ
pavivekārāmānaṃ viharataṃ pavivekaratānaṃ eseva vitakko bahulaṃ samudācarissati – ‘kiṃ akusalaṃ,
kiṃ appahīnaṃ, kiṃ pajahāmā’” ti. Etamatthaṃ bhagavā avoca. Tatthetaṃ iti vuccati –

“Tathāgataṃ buddhamasayhasāhinaṃ, duve vitakkā samudācaranti naṃ;
Khemo vitakko paṭhamo udīrito, tato viveko dutiyo pakāsito.

“Tamonudaṃ pāragataṃ mahesiṃ, taṃ pattipattaṃ vasimaṃ anāsavaṃ;
Visantaram [vesantaram (sī. ka.), vissantaram (pī.)] taṇhakkhaye vimuttaṃ, taṃ ve muniṃ
antimadehadhāriṃ;
Mārañjahaṃ [mārajahaṃ (syā.), mānajahaṃ (sī. ka.), mānaṃ jahaṃ (pī.)] brūmi jarāya
pāraguṃ.

“Sele yathā pabbatamuddhaniṭṭhito, yathāpi passe janataṃ samantato;
Tathūpamaṃ dhammayamaṃ sumedho, pāsādamārūya samantacakkhu;
Sokāvatiṇṇaṃ janatamapetasoko, avekkhati jātijarābhībhūta’ nti.

Ayampi attho vutto bhagavatā, iti me sutanti. Paṭhamam.

2. Desanāsuttaṃ

39. Vuttañhettaṃ bhagavatā, vuttamarahatāti me suttaṃ –

“Tathāgatassa, bhikkhave, arahato sammāsambuddhassa dve dhammadesanā pariyāyena bhavanti.
Katamā dve? ‘Pāpaṃ pāpakato passathā’ ti – ayaṃ paṭhamā dhammadesanā; ‘pāpaṃ pāpakato disvā

tattha nibbindatha virajjatha vimuccathā'ti – ayaṃ dutiyā dhammadesanā. Tathāgatassa, bhikkhave, arahato sammāsambuddhassa imā dve dhammadesanā pariyāyena bhavanti'ti. Etamatthaṃ bhagavā avoca. Tatthetaṃ iti vuccati –

“Tathāgatassa buddhassa, sabbabhūtānukampino;
Pariyāyavacanāṃ passa, dve ca dhammā pakāsītā.

“Pāpakaṃ passatha cetāṃ [cekāṃ (sī. pī.), chekā (syā.)], tattha cāpi virajjatha;
Tato virattacittāse, dukkhassantaṃ karissathā'ti.

Ayampi attho vutto bhagavatā, iti me sutanti. Dutiyāṃ.

3. Vijjāsuttaṃ

40. Vuttañhetāṃ bhagavatā, vuttamarahatāti me sutāṃ –

“Avijjā, bhikkhave, pubbaṅgamā akusalānaṃ dhammānaṃ samāpattiyā anvadeva ahirikaṃ anottappaṃ; vijjā ca kho, bhikkhave, pubbaṅgamā kusalānaṃ dhammānaṃ samāpattiyā anvadeva hirottappa'ti. Etamatthaṃ bhagavā avoca. Tatthetaṃ iti vuccati –

“Yā kācimā duggatiyo, asmiṃ loke paramhi ca;
Avijjāmūlikā sabbā, icchālobhasamussayā.

“Yato ca hoti pāpiccho, ahirīko anādaro;
Tato pāpaṃ pasavati, apāyaṃ tena gacchati.

“Tasmā chandañca lobhañca, avijjañca virājayaṃ;
Vijjaṃ uppādayaṃ bhikkhu, sabbā duggatiyo jahe'ti.

Ayampi attho vutto bhagavatā, iti me sutanti. Tatiyāṃ.

4. Paññāparihīnasuttaṃ

41. Vuttañhetāṃ bhagavatā, vuttamarahatāti me sutāṃ –

“Te, bhikkhave, sattā suparihīnā ye ariyāya paññāya parihīnā. Te diṭṭheva dhamme dukkhaṃ viharanti savighātaṃ saupāyāsaṃ sapariḷāhaṃ; kāyassa bhedā paraṃ maraṇā duggati pāṭikāṅkhā. Te [te ca kho (?)], bhikkhave, sattā aparihīnā ye ariyāya paññāya aparihīnā. Te diṭṭheva dhamme sukhaṃ viharanti avighātaṃ anupāyāsaṃ aparīḷāhaṃ; kāyassa bhedā paraṃ maraṇā sugati pāṭikāṅkhā'ti. Etamatthaṃ bhagavā avoca. Tatthetaṃ iti vuccati –

“Paññāya parihānena, passa lokaṃ sadevakaṃ;
Niviṭṭhaṃ nāmarūpasmīṃ, idaṃ saccanti maññati.

“Paññā hi seṭṭhā lokasmīṃ, yāyaṃ nibbedhagāminī;
Yāya sammā pajānāti, jātibhavaparikkhayaṃ.

“Tesaṃ devā manussā ca, sambuddhānaṃ satīmataṃ;
Pihayanti hāsapaññānaṃ [hāsupaññānaṃ (sī. aṭṭha.)], sarīrantimadhārīna'ti.

Ayampi attho vutto bhagavatā, iti me sutanti. Catuttham.

5. Sukkadhammasuttaṃ

42. Vuttañhetam bhagavatā, vuttamarahatāti me sutam –

“Dveme, bhikkhave, sukkā dhammā lokam pārenti. Katame dve? Hirī [hiri (sī. syā. kam. pī.)] ca, ottappañca. Ime ce, bhikkhave, dve sukkā dhammā lokam na pāleyyum, nayidha paññāyetha mātāti vā mātucchāti vā mātulanīti vā ācariyabhariyāti vā garūnam dārāti vā. Sambhedam loko agamissa yathā ajeḷakā kukkuṭasūkarā soṇasingālā [soṇasingālā (sī. syā. kam. pī.)]. Yasmā ca kho, bhikkhave, ime dve sukkā dhammā lokam pārenti tasmā paññāyati mātāti vā mātucchāti vā mātulanīti vā ācariyabhariyāti vā garūnam dārāti vā”ti. Etamattham bhagavā avoca. Tatthetam iti vuccati –

“Yesam ce hiriottappam, sabbadā ca na vijjati;
Vokkantā sukkamulā te, jātimaraṇagāmino.

“Yesañca hiriottappam, sadā sammā upatthitā;
Virūḷhabrahmacariyā te, santo khīṇapunnabbhavā”ti.

Ayampi attho vutto bhagavatā, iti me sutanti. Pañcamaṃ.

6. Ajātasuttaṃ

43. Vuttañhetam bhagavatā, vuttamarahatāti me sutam –

“Atthi, bhikkhave, ajātam abhūtam akatam asaṅkhatam. No cetam, bhikkhave, abhaviṣṣa ajātam abhūtam akatam asaṅkhatam, nayidha jātassa bhūtassa katassa saṅkhatassa nissaraṇam paññāyetha. Yasmā ca kho, bhikkhave, atthi ajātam abhūtam akatam asaṅkhatam, tasmā jātassa bhūtassa katassa saṅkhatassa nissaraṇam paññāyati”ti. Etamattham bhagavā avoca. Tatthetam iti vuccati –

“Jātam bhūtam samuppannam, kataṃ saṅkhatamaddhavam;
Jarāmarāṇasaṅghāṭam, rogañīlam [roganiḍḍham (sī.)] pabhaṅguraṃ [pabhaṅguraṃ (ka. sī. ka.), pabhaṅguraṃ (syā.)].

“Āhāranettippabhavam, nālam tadabhinanditum;
Tassa nissaraṇam santam, atakkāvacaraṃ dhavam.

“Ajātam asamuppannam, asokam virajam padam;
Nirodho dukkhadhammānam, saṅkhārūpasamo sukho”ti.

Ayampi attho vutto bhagavatā, iti me sutanti. Chaṭṭham.

7. Nibbānadhātusuttaṃ

44. Vuttañhetam bhagavatā, vuttamarahatāti me sutam –

“Dvemā, bhikkhave, nibbānadhātuyo. Katame dve? Saupādisesā ca nibbānadhātu, anupādisesā ca nibbānadhātu.

“Katamā ca, bhikkhave, saupādisesā nibbānadhātu? Idha, bhikkhave, bhikkhu araham hoti

khīṇāsavo vusitavā katakaraṇīyo ohitabhāro anuppattasadattho parikkhīṇabhavasamyojano sammadaññā vimutto. Tassa tiṭṭhanteva pañcindriyāni yesaṃ avighātattā [avigatattā (sī. aṭṭha.)] manāpāmanāpaṃ paccanubhoti, sukhadukkhaṃ paṭisaṃvedeti. Tassa yo rāgakkhayo, dosakkhayo, mohakkhayo – ayaṃ vuccati, bhikkhave, saupādisesā nibbānadhātu.

“Katamā ca, bhikkhave, anupādisesā nibbānadhātu? Idha, bhikkhave, bhikkhu araham hoti khīṇāsavo vusitavā katakaraṇīyo ohitabhāro anuppattasadattho parikkhīṇabhavasamyojano sammadaññā vimutto. Tassa idheva, bhikkhave, sabbavedayitāni anabhinanditāni sīti bhavissanti [sītūbhavissanti (?)]. Ayaṃ vuccati, bhikkhave, anupādisesā nibbānadhātu. Imā kho, bhikkhave, dve nibbānadhātuyo”ti. Etamatthaṃ bhagavā avoca. Tatthetaṃ iti vuccati –

“Duve imā cakkhumatā pakāsītā, nibbānadhātū anissitena tādīnā;
Ekā hi dhātu idha diṭṭhadhammikā, saupādisesā bhavanettisaṅkhayā;
Anupādisesā pana samparāyikā, yamhi nirujjhanti bhavāni sabbaso.

“Ye etadaññāya padaṃ asaṅkhatam, vimuttacittā bhavanettisaṅkhayā;
Te dhammasārādhigamā khaye ratā, paḥamsu te sabbabhavāni tādīno”ti.

Ayampi attho vutto bhagavatā, iti me sutanti. Sattamaṃ.

8. Paṭisallānasuttaṃ

45. Vuttañhetam bhagavatā, vuttamarahatāti me sutam –

“Paṭisallānārāmā [paṭisallānārāmā (ka.)], bhikkhave, viharatha paṭisallānaratā, ajjhataṃ cetosamathamanyuttā, anirākatajjhānā, vipassanāya samannāgatā, brūhetā suññāgārānaṃ. Paṭisallānārāmānaṃ, bhikkhave, viharataṃ paṭisallānaratānaṃ ajjhataṃ cetosamathamanyuttānaṃ anirākatamajjhānānaṃ vipassanāya samannāgatānaṃ brūhetānaṃ suññāgārānaṃ dvinnam phalānaṃ aññataram phalaṃ pāṭikaṅkham – diṭṭheva dhamme aññā, satī vā upādisese anāgāmitā”ti. Etamatthaṃ bhagavā avoca. Tatthetaṃ iti vuccati –

“Ye santacittā nipakā, satimanto ca [satimantova (sī. ka.)] jhāyino;
Sammā dhammaṃ vipassanti, kāmesu anapekkinno.

“Appamādaratā santā, pamāde bhayadassino;
Abhabbā parihānāya, nibbānasseva santike”ti.

Ayampi attho vutto bhagavatā, iti me sutanti. Aṭṭhamaṃ.

9. Sikkhānisamsasuttaṃ

46. Vuttañhetam bhagavatā, vuttamarahatāti me sutam –

“Sikkhānisamsā, bhikkhave, viharatha paññuttarā vimuttisārā satādhipeyyā. Sikkhānisamsānaṃ, bhikkhave, viharataṃ paññuttarānaṃ vimuttisārānaṃ satādhipeyyānaṃ dvinnam phalānaṃ aññataram phalaṃ pāṭikaṅkham – diṭṭheva dhamme aññā, satī vā upādisese anāgāmitā”ti. Etamatthaṃ bhagavā avoca. Tatthetaṃ iti vuccati –

“Paripuṇṇasikkham [paripuṇṇasekham (sī.), paripuṇṇasekkham (syā.)] apahānadhammaṃ,
paññuttaram jātikhayantadassim;

Taṃ ve muniṃ antimadehadhāriṃ, mārañjahaṃ brūmi jarāya pāraguṃ.

“Tasmā sadā jhānaratā samāhitā, ātāpino jātikhayantadassino;
Māraṃ sasenāṃ abhibhuyya bhikkhavo, bhavatha jātimaraṇassa pāragā”’ti.

Ayampi attho vutto bhagavatā, iti me sutanti. Navamaṃ.

10. Jāgariyasuttaṃ

47. Vuttañhettaṃ bhagavatā, vuttamarahatāti me suttaṃ –

“Jāgaro cassa, bhikkhave, bhikkhu vihareyya sato sampajāno samāhito pamudito vippasanno ca tattha kālavipassī ca kusalesu dhammesu. Jāgarassa, bhikkhave, bhikkhuno viharato satassa sampajānassa samāhitassa pamuditassa vippasannassa tattha kālavipassino kusalesu dhammesu dvinnaṃ phalānaṃ aññataraṃ phalaṃ pāṭikaṅkhaṃ – diṭṭheva dhamme aññā, sati vā upādisese anāgāmitā”’ti. Etamatthaṃ bhagavā avoca. Tatthetaṃ iti vuccati –

“Jāgarantā suñāthetaṃ, ye suttā te pabujjhatha;
Suttā jāgaritaṃ seyyo, natthi jāgarato bhayaṃ.

“Yo jāgaro ca satimā sampajāno, samāhito mudito vippasanno ca;
Kālena so sammā dhammaṃ parivīmaṃsamāno, ekodibhūto vihane tamaṃ so.

“Tasmā have jāgariyaṃ bhajetha, ātāpī bhikkhu nīpako jhānalābhī;
Saṃyojanaṃ jātijarāya chetvā, idheva sambodhimanuttaraṃ phuse”’ti.

Ayampi attho vutto bhagavatā, iti me sutanti. Dasamaṃ.

11. Āpāyikasuttaṃ

48. Vuttañhettaṃ bhagavatā, vuttamarahatāti me suttaṃ –

“Dveme, bhikkhave, āpāyikā nerayikā idamappahāya. Katame dve? Yo ca abrahmacārī brahmacāripaññaṃ, yo ca paripuññaṃ parisuddhaṃ brahmacariyaṃ carantaṃ amūlakena abrahmacariyena anuddhaṃseti. Ime kho, bhikkhave, dve āpāyikā nerayikā idamappahāyā”’ti. Etamatthaṃ bhagavā avoca. Tatthetaṃ iti vuccati –

“Abhūtavādī nirayaṃ upeti, yo vāpi katvā na karomi cāha;
Ubhopi te pecca samā bhavanti, nihīnakammā manujā parattha.

“Kāsāvakaṅṭhā bahavo, pāpadhammā asaññatā;
Pāpā pāpehi kammehi, nirayaṃ te upapajjare.

“Seyyo ayogūlo bhutto, tatto aggisikhūpamo;
Yañce bhuñjeyya dussīlo, raṭṭhapiṇḍamasaññato”’ti.

Ayampi attho vutto bhagavatā, iti me sutanti. Ekādasamaṃ.

12. Diṭṭhigatasuttaṃ

49. Vuttañhetam bhagavatā, vuttamarahatāti me sutam –

“Dvīhi, bhikkhave, diṭṭhigatehi pariyuṭṭhitā devamanussā olīyanti eke, atidhāvanti eke; cakkhumanto ca passanti.

“Kathañca, bhikkhave, olīyanti eke? Bhavārāmā, bhikkhave, devamanussā bhavaratā bhavasammuditā tesam bhavanirodhāya dhamme desiyamāne cittaṃ na pakkhandati na pasīdati na santiṭṭhati nādhimuccati. Evaṃ kho, bhikkhave, olīyanti eke.

“Kathañca, bhikkhave, atidhāvanti eke? Bhaveneva kho paneke aṭṭiyamānā harāyamānā jigucchamānā vibhavaṃ abhinandanti – yato kira, bho, ayaṃ attā [satto (sī. ka.)] kāyassa bhedā paraṃ maraṇā ucchijjati vinassati na hoti paraṃ maraṇā; etaṃ santaṃ etaṃ paṇītaṃ etaṃ yāthāvanti. Evaṃ kho, bhikkhave, atidhāvanti eke.

“Kathañca, bhikkhave, cakkhumanto passanti? Idha bhikkhu bhūtaṃ bhūtato passati; bhūtaṃ bhūtato disvā bhūtassa nibbidāya virāgāya nirodhāya paṭipanno hoti. Evaṃ kho, bhikkhave, cakkhumanto passanti”ti. Etamatthaṃ bhagavā avoca. Tatthetaṃ iti vuccati –

“Ye [yo (syā. ka.)] bhūtaṃ bhūtato disvā, bhūtassa ca atikkamaṃ; Yathābhūte vimuccanti, bhavataṇhā parikkhayā.

“Sa ve [sace (ka. sī. syā. pī.)] bhūtapariñño, so vītataṇho bhavābhave; Bhūtassa vibhavā bhikkhu, nāgacchati punabbhava”nti.

Ayampi attho vutto bhagavatā, iti me sutanti. Dvādasamaṃ.

Dutiyo vaggo niṭṭhito.

Tassuddānaṃ –

Dve indriyā dve tapanīyā, sīlena apare duve;
Anottāpī kuhanā dve ca, saṃvejanīyena te dasa.

Vitakkā desanā vijjā, paññā dhammena pañcamaṃ;
Ajātaṃ dhātusallānaṃ, sikkhā jāgariyena ca;
Apāyadiṭṭhiyā ceva [yeva (sī. syā.)], bāvīsati pakāsītāti.

Dukanipāto niṭṭhito.

3. Tikanipāto

1. Paṭhamavaggo

1. Mūlasuttaṃ

50. Vuttañhetam bhagavatā, vuttamarahatāti me sutam –

“Tīṇimāni, bhikkhave, akusalamūlāni. Katamāni tīṇi? Lobho akusalamūlaṃ, doso akusalamūlaṃ, moho akusalamūlaṃ – imāni kho, bhikkhave, tīṇi akusalamūlāni”ti. Etamatthaṃ bhagavā avoca. Tatthetaṃ iti vuccati –

“Lobho doso ca moho ca, purisaṃ pāpacetasam;
Hiṃsanti attasambhūtā, tacasāraṃva samphala”nti.

Ayampi attho vutto bhagavatā, iti me sutanti. Paṭhamam.

2. Dhātusuttaṃ

51. Vuttañhetam bhagavatā, vuttamarahatāti me sutam –

“Tisso imā, bhikkhave, dhātuyo. Katamā tisso? Rūpadhātu, arūpadhātu, nirodhadhātu – imā kho, bhikkhave, tisso dhātuyo”ti. Etamattham bhagavā avoca. Tatthetam iti vuccati –

“Rūpadhātuṃ [rūpadhātu (sabbattha)] pariññāya, arūpesu asaṅghitā;
Nirodhe ye vimuccanti, te janā maccuhāyino.

“Kāyena amatam dhātuṃ, phusayitvā [phussayitvā (syā.), phassayitvā (pī.)] nirūpadhiṃ;
Upadhippaṭṭinissaggaṃ, sacchikatvā anāsavo;
Deseti sammāsambuddho, asokaṃ virajaṃ pada”nti.

Ayampi attho vutto bhagavatā, iti me sutanti. dutiyam.

3. Paṭhamavedanāsuttaṃ

52. Vuttañhetam bhagavatā, vuttamarahatāti me sutam –

“Tisso imā, bhikkhave, vedanā. Katamā tisso? Sukhā vedanā, dukkhā vedanā, adukkhamasukhā vedanā –

Imā kho, bhikkhave, tisso vedanā”ti. Etamattham bhagavā avoca. Tatthetam iti vuccati –

“Samāhito sampajāno, sato buddhassa sāvako;
Vedanā ca pajānāti, vedanānañca sambhavaṃ.

“Yattha cetā nirujjhanti, maggañca khayagāminam;
Vedanānaṃ khayā bhikkhu, nicchāto parinibbuto”ti.

Ayampi attho vutto bhagavatā, iti me sutanti. Tatiyam.

4. Dutiyavedanāsuttaṃ

53. Vuttañhetam bhagavatā, vuttamarahatāti me sutam –

“Tisso imā, bhikkhave, vedanā. Katamā tisso? Sukhā vedanā, dukkhā vedanā, adukkhamasukhā vedanā. Sukhā, bhikkhave, vedanā dukkhato daṭṭhabbā; dukkhā vedanā sallato daṭṭhabbā; adukkhamasukhā vedanā aniccato daṭṭhabbā. Yato kho, bhikkhave, bhikkhuno sukhā vedanā dukkhato diṭṭhā hoti, dukkhā vedanā sallato diṭṭhā hoti, adukkhamasukhā vedanā aniccato diṭṭhā hoti; ayam vuccati, bhikkhave, ‘bhikkhu ariyo sammaddaso acchecchi [acchejji (sī. pī.), acchijji (ka.)], taṇham, vivattayi [vāvattayi (sī. aṭṭha.)] saṃyojanaṃ, sammā mānābhisaṃmayā antamakāsi dukkhassā”ti. Etamattham bhagavā avoca. Tatthetam iti vuccati –

“Yo sukhaṃ dukkhato adda [dakkhi (sī. pī. ka.), adakkhi (syā.)], dukkhamaddakkhi sallato;
Adukkhamasukhaṃ santaṃ, adakkhi naṃ aniccato.

“Sa ve sammaddaso bhikkhu, yato tattha vimuccati;
Abhiññāvosito santo, sa ve yogātigo munī”’ti.

Ayampi attho vutto bhagavatā, iti me sutanti. Catutthaṃ.

5. Paṭhamaesanāsuttaṃ

54. Vuttañhettaṃ bhagavatā, vuttamarahatāti me suttaṃ –

“Tisso imā, bhikkhave, esanā. Katamā tisso? Kāmesanā, bhavesanā, brahmacariyesanā – imā kho,
bhikkhave, tisso esanā”’ti. Etamatthaṃ bhagavā avoca. Tatthettaṃ iti vuccati –

“Samāhito sampajāno, sato buddhassa sāvako;
Esanā ca pajānāti, esanānañca sambhavaṃ.

“Yattha cetā nirujjhanti, maggañca khayagāminam;
Esanānaṃ khayā bhikkhu, nicchāto parinibbuto”’ti.

Ayampi attho vutto bhagavatā, iti me sutanti. Pañcamaṃ.

6. Dutiyaesanāsuttaṃ

55. Vuttañhettaṃ bhagavatā, vuttamarahatāti me suttaṃ –

“Tisso imā, bhikkhave, esanā. Katamā tisso? Kāmesanā, bhavesanā, brahmacariyesanā – imā kho,
bhikkhave, tisso esanā”’ti. Etamatthaṃ bhagavā avoca. Tatthettaṃ iti vuccati –

“Kāmesanā bhavesanā, brahmacariyesanā saha;
Iti saccaparāmāso, diṭṭhiṭṭhānā samussayā.

“Sabbarāgavirattassa, taṇhakkhayavimuttino;
Esanā paṇinissaṭṭhā, diṭṭhiṭṭhānā samūhatā;
Esanānaṃ khayā bhikkhu, nirāso akathaṃkathī”’ti.

Ayampi attho vutto bhagavatā, iti me sutanti. Chaṭṭhaṃ.

7. Paṭhamaāsavasuttaṃ

56. Vuttañhettaṃ bhagavatā, vuttamarahatāti me suttaṃ –

“Tayome, bhikkhave, āsavā. Katame tayo? Kāmāsavo, bhavāsavo, avijjāsavo – ime kho,
bhikkhave, tayo āsavā”’ti. Etamatthaṃ bhagavā avoca. Tatthettaṃ iti vuccati –

“Samāhito sampajāno, sato buddhassa sāvako;
Āsave ca pajānāti, āsavānañca sambhavaṃ.

“Yattha cetā nirujjhanti, maggañca khayagāminam;

Āsavānaṃ khayā bhikkhu, nicchāto parinibbuto’’ti.

Ayampi attho vutto bhagavatā, iti me sutanti. Sattamaṃ.

8. Dutiyāāsavasuttaṃ

57. Vuttañhettaṃ bhagavatā, vuttamarahatāti me suttaṃ –

‘‘Tayo me, bhikkhave, āsavā. Katame tayo? Kāmāsavo, bhavāsavo, avijjāsavo – ime kho, bhikkhave, tayo āsavā’’ti. Etamatthaṃ bhagavā avoca. Tatthettaṃ iti vuccati –

‘‘Yassa kāmāsavo khīṇo, avijjā ca virājitā;
Bhavāsavo parikkhīṇo, vippamutto nirūpadhi;
Dhāreti antimaṃ dehaṃ, jetvā māraṃ savāhini’’nti [savāhananti (bahūsu)].

Ayampi attho vutto bhagavatā, iti me sutanti. Atthamaṃ.

9. Taṇhāsuttaṃ

58. Vuttañhettaṃ bhagavatā, vuttamarahatāti me suttaṃ –

‘‘Tisso imā, bhikkhave, taṇhā. Katamā tisso? Kāmatāṇhā, bhavataṇhā, vibhavataṇhā – imā kho, bhikkhave, tisso taṇhā’’ti. Etamatthaṃ bhagavā avoca. Tatthettaṃ iti vuccati –

‘‘Taṇhāyogena saṃyuttā, rattacittā bhavābhavā;
Te yogayuttā mārasa, ayogakkhemino janā;
Sattā gacchanti saṃsāraṃ, jātīmaraṇagāmino.

‘‘Ye ca taṇhaṃ pahantvāna, vītataṇhā [nikkaṇhā ca (sī. ka.)] bhavābhavā;
Te ve [te ca (sī. pī. ka.)] pāraṅgatā [pāragatā (ka. sī. syā.)] loke, ye pattā āsavakkhaya’’nti.

Ayampi attho vutto bhagavatā, iti me sutanti. Navamaṃ.

10. Māradheyyasuttaṃ

59. Vuttañhettaṃ bhagavatā, vuttamarahatāti me suttaṃ –

‘‘Tīhi, bhikkhave, dhammehi samannāgato bhikkhu atikkamma māradheyyaṃ ādiccova virocati. Katamehi tīhi? Idha, bhikkhave, bhikkhu asekhena sīlakkhandhena samannāgato hoti, asekhena samādhikkhandhena samannāgato hoti, asekhena paññākkhandhena samannāgato hoti – imehi kho, bhikkhave, tīhi dhammehi samannāgato bhikkhu atikkamma māradheyyaṃ ādiccova virocati’’ti. Etamatthaṃ bhagavā avoca. Tatthettaṃ iti vuccati –

‘‘Sīlaṃ samādhi paññā ca, yassa ete subhāvitā;
Atikkamma māradheyyaṃ, ādiccova virocati’’ti.

Ayampi attho vutto bhagavatā, iti me sutanti. Dasamaṃ.

Paṭhama vaggo niṭṭhito.

Tassuddānaṃ –

Mūladhātu atha vedanā duve, esanā ca duve āsavā duve;
Taṇhāto ca atha [taṇhāto atha (syā.)] māradheyato, vaggamāhu paṭhamanti muttamanti.

2. Dutiyavaggo

1. Puññakiriyavatthusuttaṃ

60. Vuttañhettaṃ bhagavatā, vuttamarahatāti me suttaṃ –

“Tīṇimāni, bhikkhave, puññakiriyavatthūni. Katamāni tīṇi? Dānamayaṃ puññakiriyavatthu, sīlamayaṃ puññakiriyavatthu, bhāvanāmayayaṃ puññakiriyavatthu – imāni kho, bhikkhave, tīṇi puññakiriyavatthūnī”ti. Etamatthaṃ bhagavā avoca. Tatthettaṃ iti vuccati –

“Puññameva so sikkheyya, āyataggaṃ sukhudrayaṃ;
Dānañca samacariyañca, mettacittañca bhāvaye.

“Ete dhamme bhāvayitvā, tayo sukhasamuddaye;
Abyāpajjhaṃ sukhaṃ lokhaṃ, paṇḍito upapajjati”ti.

Ayampi attho vutto bhagavatā, iti me sutanti. Paṭhamamaṃ.

2. Cakkhusuttaṃ

61. Vuttañhettaṃ bhagavatā, vuttamarahatāti me suttaṃ –

“Tīṇimāni, bhikkhave, cakkhūni. Katamāni tīṇi? Maṃsacakkhu, dibbacakkhu, paññācakkhu – imāni kho, bhikkhave, tīṇi cakkhūnī”ti. Etamatthaṃ bhagavā avoca. Tatthettaṃ iti vuccati –

“Maṃsacakkhu dibbacakkhu, paññācakkhu anuttaraṃ;
Etāni tīṇi cakkhūni, akkhāsi purisuttamo.

“Maṃsacakkhussa uppādo, maggo dibbassa cakkhuno;
Yato ñāṇaṃ udapādi, paññācakkhu anuttaraṃ;
Yassa cakkhussa paṭilābhā, sabbadukkhā pamuccati”ti.

Ayampi attho vutto bhagavatā, iti me sutanti. Dutiyamaṃ.

3. Indriyasuttaṃ

62. Vuttañhettaṃ bhagavatā, vuttamarahatāti me suttaṃ –

“Tīṇimāni, bhikkhave, indriyāni. Katamāni tīṇi? Anaññātāññassāmītindriyaṃ, aññindriyaṃ, aññātāvindriyaṃ – imāni kho, bhikkhave, tīṇi indriyānī”ti. Etamatthaṃ bhagavā avoca. Tatthettaṃ iti vuccati –

“Sekhassa sikkhamānassa, ujumaggānusārino;
Khayasmiṃ paṭhamamaṃ ñāṇaṃ, tato aññā anantarā.

“Tato aññā vimuttassa, ñāṇaṃ ve hoti tādino;
Akuppā me vimuttīti, bhavasamyojanakkhayā.

“Sa ve [sace (sī. syā.)] indriyasampanno, santo santipade rato;
Dhāreti antimaṃ dehaṃ, jetvā māraṃ savāhini”’nti.

Ayampi attho vutto bhagavatā, iti me sutanti. Tatiyaṃ.

4. Addhāsuttaṃ

63. Vuttañhettaṃ bhagavatā, vuttamarahatāti me suttaṃ –

“Tayome, bhikkhave, addhā. Katame tayo? Atīto addhā, anāgato addhā, paccuppanno addhā – ime kho, bhikkhave, tayo addhā”’ti. Etamatthaṃ bhagavā avoca. Tatthettaṃ iti vuccati –

“Akkheyyasaññino sattā, akkheyyasmiṃ patiṭṭhitā;
Akkheyyaṃ apariññāya, yogamāyanti maccuno.

“Akkheyyaṅca pariññāya, akkhātāraṃ na maññati;
Phuṭṭho vimokkho manasā, santipadamanuttaraṃ.

“Sa ve [sace (ka.)] akkheyyasampanno, santo santipade rato;
Saṅkhāyasevī dhammaṭṭho, saṅkhyāṃ nopeti vedagū”’ti.

Ayampi attho vutto bhagavatā, iti me sutanti. Catutthaṃ.

5. Duccaritasuttaṃ

64. Vuttañhettaṃ bhagavatā, vuttamarahatāti me suttaṃ –

“Tīṇimāni, bhikkhave, duccaritāni. Katamāni tīṇi? Kāyaduccaritaṃ, vacīduccaritaṃ, manoduccaritaṃ – imāni kho, bhikkhave, tīṇi duccaritāni”’ti. Etamatthaṃ bhagavā avoca. Tatthettaṃ iti vuccati –

“Kāyaduccaritaṃ katvā, vacīduccaritāni ca;
Manoduccaritaṃ katvā, yañcaññaṃ dosasaṃhitāṃ.

“Akatvā kusalaṃ kammaṃ, katvānākusalaṃ bahuṃ;
Kāyassa bhedaṃ duppañño, nirayaṃ sopapajjati”’ti.

Ayampi attho vutto bhagavatā, iti me sutanti. Pañcamaṃ.

6. Sucaritasuttaṃ

65. Vuttañhettaṃ bhagavatā, vuttamarahatāti me suttaṃ –

“Tīṇimāni, bhikkhave, sucaritāni. Katamāni tīṇi? Kāyasucaritaṃ, vacīsucaritaṃ, manosucaritaṃ – imāni kho, bhikkhave, tīṇi sucaritāni”’ti. Etamatthaṃ bhagavā avoca. Tatthettaṃ iti vuccati –

“Kāyaduccaritaṃ hitvā, vacīduccaritāni ca;

Manoduccaritaṃ hitvā, yañcaññaṃ dosasaṃhitāṃ.

“Akatvākusalaṃ kammaṃ, katvāna kusalaṃ bahuṃ;
Kāyassa bheda sappañño, saggāṃ so upapajjati”ti.

Ayampi attho vutto bhagavatā, iti me sutanti. Chaṭṭhaṃ.

7. Soceyyasuttaṃ

66. Vuttañhetāṃ bhagavatā, vuttamarahatāti me sutāṃ –

“Tīṇimāni, bhikkhave, soceyyāni. Katamāni tīṇi? Kāyasoceyyaṃ, vacīsoceyyaṃ, manosoceyyaṃ – imāni kho, bhikkhave, tīṇi soceyyāni”ti. Etamatthaṃ bhagavā avoca. Tatthetaṃ iti vuccati –

“Kāyasuciṃ vacīsuciṃ [[vācāsuciṃ \(ka.\)](#)], cetosucimanāsavaṃ;
Suciṃ soceyyasampannaṃ, āhu sabbappahāyina”nti [[āhu ninhātapāpakanti \(a. ni. 3.122\)](#)
[yuttataraṃ](#)].

Ayampi attho vutto bhagavatā, iti me sutanti. Sattamaṃ.

8. Moneyyasuttaṃ

67. Vuttañhetāṃ bhagavatā, vuttamarahatāti me sutāṃ –

“Tīṇimāni, bhikkhave, moneyyāni. Katamāni tīṇi? Kāyamoneyyaṃ, vacīmoneyyaṃ, manomoneyyaṃ – imāni kho, bhikkhave, tīṇi moneyyāni”ti. Etamatthaṃ bhagavā avoca. Tatthetaṃ iti vuccati –

“Kāyamuniṃ vacīmuniṃ, manomunimanāsavaṃ;
Muniṃ moneyyasampannaṃ, āhu ninhātapāpaka”nti [[āhu sabbappahāyinenti \(a. ni. 3.123\)](#)].

Ayampi attho vutto bhagavatā, iti me sutanti. Aṭṭhamaṃ.

9. Paṭhamarāgasuttaṃ

68. Vuttañhetāṃ bhagavatā, vuttamarahatāti me sutāṃ –

“Yassa kassaci, bhikkhave, rāgo appahīno, doso appahīno, moho appahīno – ayaṃ vuccati, bhikkhave, ‘baddho [[bando \(bahūsu\)](#)] māraṃsa paṭimukkassa mārapāso yathākāmakaraṇīyo [[yathā kāmakaraṇīyo ca \(sī. syā. pī. ka.\)](#)] pāpimato’. Yassa kassaci, bhikkhave, rāgo pahīno, doso pahīno, moho pahīno – ayaṃ vuccati, bhikkhave, ‘abaddho māraṃsa omukkassa mārapāso na yathā kāmakaraṇīyo [[na yathākāmakaraṇīyo ca \(syā.\)](#)] pāpimato”’ti. Etamatthaṃ bhagavā avoca. Tatthetaṃ iti vuccati –

“Yassa rāgo ca doso ca, avijjā ca virājitā;
Taṃ bhāvitattaññataraṃ, brahmabhūtaṃ tathāgataṃ;
Buddhaṃ verabhayātītaṃ, āhu sabbappahāyina”nti.

Ayampi attho vutto bhagavatā, iti me sutanti. Navamaṃ.

10. Dutiyarāgasuttaṃ

69. Vuttañhetam bhagavatā, vuttamarahatāti me sutam –

“Yassa kassaci, bhikkhave, bhikkhussa vā bhikkhuniyā vā rāgo appahīno, doso appahīno, moho appahīno – ayam vuccati, bhikkhave, na ‘atari [atiṇṇo (ka. sī. ka.)] samuddam saūmiṃ savīciṃ sāvattaṃ sagahaṃ sarakkhasaṃ’. Yassa kassaci, bhikkhave, bhikkhussa vā bhikkhuniyā vā rāgo pahīno, doso pahīno, moho pahīno – ayam vuccati, bhikkhave, ‘atari samuddam saūmiṃ savīciṃ sāvattaṃ sagahaṃ sarakkhasaṃ, tiṇṇo pāraṅgato [pāragato (sī. aṭṭha. syā.)] thale tiṭṭhati brāhmaṇo’’ti. Etamattham bhagavā avoca. Tatthetam iti vuccati –

“Yassa rāgo ca doso ca, avijjā ca virājitā;
Somaṃ samuddam sagahaṃ sarakkhasaṃ, saūmibhayaṃ duttaram accatāri.

“Saṅgātigo maccujaho nirūpadhi, pahāsi dukkham apunabbhavāya;
Atthaṅgato so na pamāṇameti, amohayi maccurājanti brūmī’’ti.

Ayampi attho vutto bhagavatā, iti me sutanti. Dasamaṃ.

Dutiyo vaggo niṭṭhito.

Tassuddānaṃ –

Puññaṃ cakkhu atha indriyāni [atthindriyā (syā.)], addhā ca caritaṃ duve soci [suci (syā.)];
Muno [mune (syā.)] atha rāgaduve, puna vaggamāhu dutiyamuttamanti.

3. Tatiyavaggo

1. Micchādiṭṭhikasuttaṃ

70. Vuttañhetam bhagavatā, vuttamarahatāti me sutam –

“Diṭṭhā mayā, bhikkhave, sattā kāyaduccaritena samannāgatā vacīduccaritena samannāgatā manoduccaritena samannāgatā ariyānaṃ upavādakā micchādiṭṭhikā micchādiṭṭhikammasamādānā. Te kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapannā.

“Taṃ kho panāhaṃ, bhikkhave, nāññassa samaṇassa vā brāhmaṇassa vā sutvā vadāmi. Diṭṭhā mayā, bhikkhave, sattā kāyaduccaritena samannāgatā vacīduccaritena samannāgatā manoduccaritena samannāgatā ariyānaṃ upavādakā micchādiṭṭhikā micchādiṭṭhikammasamādānā. Te kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapannā. Api ca, bhikkhave, yadeva sāmaṃ ñātaṃ sāmaṃ diṭṭhaṃ sāmaṃ viditaṃ tadevāhaṃ vadāmi.

“Diṭṭhā mayā, bhikkhave, sattā kāyaduccaritena samannāgatā vacīduccaritena samannāgatā manoduccaritena samannāgatā ariyānaṃ upavādakā micchādiṭṭhikā micchādiṭṭhikammasamādānā. Te kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapannā’’ti. Etamattham bhagavā avoca. Tatthetam iti vuccati –

“Micchā manam pañidhāya, micchā vācañca bhāsiya [micā vācam abhāsiya (sabbattha)];
Micchā kammāni katvāna, kāyena idha puggalo.

“Appassutāpuññakaro [appassutopuññakaro (sī.), appassuto apuññakaro (syā. pī.)], appasmim idha jīvite;

Kāyassa bheda duppañño, nirayaṃ sopapajjati’ ti.

Ayampi attho vutto bhagavatā, iti me sutanti. Paṭhamam.

2. Sammādiṭṭhikasuttaṃ

71. Vuttañhetam bhagavatā, vuttamarahatāti me sutam –

“Diṭṭhā mayā, bhikkhave, sattā kāyasucaritena samannāgatā vacīsucaritena samannāgatā manosucaritena samannāgatā ariyānaṃ anupavādakā sammādiṭṭhikā sammādiṭṭhikammasamādānā. Te kāyassa bheda param maraṇā sugatiṃ saggam lokaṃ upapannā.

“Tam kho panāham, bhikkhave, nāññassa samaṇassa vā brāhmaṇassa vā sutvā vadāmi. Diṭṭhā mayā, bhikkhave, sattā kāyasucaritena samannāgatā vacīsucaritena samannāgatā manosucaritena samannāgatā ariyānaṃ anupavādakā sammādiṭṭhikā sammādiṭṭhikammasamādānā. Te kāyassa bheda param maraṇā sugatiṃ saggam lokaṃ upapannā. Api ca, bhikkhave, yadeva sāmaṃ ñātam sāmaṃ diṭṭham sāmaṃ viditam tadevāham vadāmi.

“Diṭṭhā mayā, bhikkhave, sattā kāyasucaritena samannāgatā vacīsucaritena samannāgatā manosucaritena samannāgatā ariyānaṃ anupavādakā sammādiṭṭhikā sammādiṭṭhikammasamādānā. Te kāyassa bheda param maraṇā sugatiṃ saggam lokaṃ upapannā’ ti. Etamattham bhagavā avoca. Tatthetam iti vuccati –

“Sammā manam pañidhāya, sammā vācañca bhāsiya [sammā vācam abhāsiya (sabbattha)];
Sammā kammāni katvāna, kāyena idha puggalo.

“Bahussuto puññakaro, appasmim idha jīvite;
Kāyassa bheda sappañño, saggam so upapajjati’ ti.

Ayampi attho vutto bhagavatā, iti me sutanti. Dutiyam.

3. Nissaraṇiyasuttaṃ

72. Vuttañhetam bhagavatā, vuttamarahatāti me sutam –

“Tisso imā, bhikkhave, nissaraṇiyā [nissaraṇiyā (a. ni. 5.200)] dhātuyo. Katamā tisso? Kāmānametaṃ nissaraṇam yadidaṃ nekkhammaṃ, rūpānametaṃ nissaraṇam yadidaṃ āruppaṃ, yaṃ kho pana kiñci bhūtam sañkhataṃ paṭicasamuppannaṃ nirodho tassa nissaraṇam – imā kho, bhikkhave, tisso nissaraṇiyā dhātuyo’ ti. Etamattham bhagavā avoca. Tatthetam iti vuccati –

“Kāmanissaraṇam ñatvā, rūpānañca atikkamaṃ;
Sabbasañkhārasamathaṃ, phusaṃ ātāpi sabbadā.

“Sa ve sammaddaso bhikkhu, yato tattha vimuccati;
Abhiññāvoso santo, sa ve yogātigo munī’ ti.

Ayampi attho vutto bhagavatā, iti me sutanti. Tatiyam.

4. Santatarasuttaṃ

73. Vuttañhetam bhagavatā, vuttamarahatāti me sutam –

“Rūpehi, bhikkhave, arūpā [āruppā (sī.)] santatarā, arūpehi nirodho santataro”ti. Etamattham bhagavā avoca. Tatthetam iti vuccati –

“Ye ca rūpūpagā sattā, ye ca arūpaṭṭhāyino [ārappaṭṭhāyino (sī.)];
Nirodham appajānantā, āgantāro punabbhavam.

“Ye ca rūpe pariññāya, arūpesu asaṅghitā;
Nirodhe ye vimuccanti, te janā maccuhāyino.

“Kāyena amataṃ dhātuṃ, phusayitvā nirūpadhiṃ;
Upadhippaṭinissaggaṃ, sacchikatvā anāsavo;
Deseti sammāsambuddho, asokaṃ virajaṃ pada”nti.

Ayampi attho vutto bhagavatā, iti me sutanti. Catuttham.

5. Puttasuttam

74. Vuttañhetam bhagavatā, vuttamarahatāti me sutam –

“Tayome, bhikkhave, puttā santo saṃvijjamānā lokasmiṃ. Katame tayo? Atijāto, anujāto, avajātoti.

“Kathaṅca, bhikkhave, putto atijāto hoti? Idha, bhikkhave, puttassa mātāpitaro honti buddham saraṇam gatā, na dhammam saraṇam gatā, na saṅgham saraṇam gatā; pāṇātipātā appaṭiviratā, adinnādānā appaṭiviratā, kāmesumicchācārā appaṭiviratā, musāvādā appaṭiviratā, surāmerayamajjapamādaṭṭhānā appaṭiviratā, dussilā pāpadhammā. Putto ca nesam hoti buddham saraṇam gato, dhammam saraṇam gato, saṅgham saraṇam gato; pāṇātipātā paṭivirato, adinnādānā paṭivirato, kāmesumicchācārā paṭivirato, musāvādā paṭivirato, surāmerayamajjapamādaṭṭhānā paṭivirato, silavā kalyāṇadhammo. Evaṃ kho, bhikkhave, putto atijāto hoti.

“Kathaṅca, bhikkhave, putto anujāto hoti? Idha, bhikkhave, puttassa mātāpitaro honti buddham saraṇam gatā, dhammam saraṇam gatā, saṅgham saraṇam gatā; pāṇātipātā paṭiviratā, adinnādānā paṭiviratā, kāmesumicchācārā paṭiviratā, musāvādā paṭiviratā, surāmerayamajjapamādaṭṭhānā paṭiviratā, silavanto kalyāṇadhammā. Puttopi nesam hoti buddham saraṇam gato, dhammam saraṇam gato, saṅgham saraṇam gato; pāṇātipātā paṭivirato, adinnādānā paṭivirato, kāmesumicchācārā paṭivirato, musāvādā paṭivirato, surāmerayamajjapamādaṭṭhānā paṭivirato, silavā kalyāṇadhammo. Evaṃ kho, bhikkhave, putto anujāto hoti.

“Kathaṅca, bhikkhave, putto avajāto hoti? Idha, bhikkhave, puttassa mātāpitaro honti buddham saraṇam gatā, dhammam saraṇam gatā, saṅgham saraṇam gatā; pāṇātipātā paṭiviratā, adinnādānā paṭiviratā, kāmesumicchācārā paṭiviratā, musāvādā paṭiviratā, surāmerayamajjapamādaṭṭhānā paṭiviratā, silavanto kalyāṇadhammā. Putto ca nesam hoti na buddham saraṇam gato, na dhammam saraṇam gato, na saṅgham saraṇam gato; pāṇātipātā appaṭivirato, adinnādānā appaṭivirato, kāmesumicchācārā appaṭivirato, musāvādā appaṭivirato, surāmerayamajjapamādaṭṭhānā appaṭivirato, dussilo pāpadhammo. Evaṃ kho, bhikkhave, putto avajāto hoti. Ime kho, bhikkhave, tayo puttā santo saṃvijjamānā lokasmi”nti. Etamattham bhagavā avoca. Tatthetam iti vuccati –

“Atijātam anujātam, puttamicchanti paṇḍitā;
Avajātam na icchanti, yo hoti kulagandhano.

“Ete kho puttā lokasmiṃ, ye bhavanti upāsakā;
Saddhā sīlena sampannā, vadaññū vītamaccharā;
Cando abbhaghanā mutto, parisāsu virocare”ti.

Ayampi attho vutto bhagavatā, iti me sutanti. Pañcamaṃ.

6. Avuṭṭhikasuttaṃ

75. Vuttañhettaṃ bhagavatā, vuttamarahatāti me suttaṃ –

“Tayome, bhikkhave, puggalā santo saṃvijjamānā lokasmiṃ. Katame tayo? Avuṭṭhikasamo, padesavassī, sabbatthābhivassī.

“Kathaṇca, bhikkhave, puggalo avuṭṭhikasamo hoti? Idha, bhikkhave, ekacco puggalo sabbesaññeva na dātā hoti, samaṇabrāhmaṇakapaṇaddhikavanibbakayācakānaṃ [...
[vaṇibbakayācakānaṃ \(sī.\)](#)] annaṃ pānaṃ vatthaṃ yānaṃ mālāgandhavilepanaṃ seyyāvasathapadīpeyyaṃ. Evaṃ kho, bhikkhave, puggalo avuṭṭhikasamo hoti.

“Kathaṇca, bhikkhave, puggalo padesavassī hoti? Idha, bhikkhave, ekacco puggalo ekaccānaṃ dātā (hoti) [[\(\) natthi syāmapotthake](#)], ekaccānaṃ na dātā hoti samaṇabrāhmaṇakapaṇaddhikavanibbakayācakānaṃ annaṃ pānaṃ vatthaṃ yānaṃ mālāgandhavilepanaṃ seyyāvasathapadīpeyyaṃ. Evaṃ kho, bhikkhave, puggalo padesavassī hoti.

“Kathaṇca, bhikkhave, puggalo sabbatthābhivassī hoti? Idha, bhikkhave, ekacco puggalo sabbesaṃva deti, samaṇabrāhmaṇakapaṇaddhikavanibbakayācakānaṃ annaṃ pānaṃ vatthaṃ yānaṃ mālāgandhavilepanaṃ seyyāvasathapadīpeyyaṃ. Evaṃ kho, bhikkhave, puggalo sabbatthābhivassī hoti. Ime kho, bhikkhave, tayo puggalā santo saṃvijjamānā lokasmi”nti. Etamatthaṃ bhagavā avoca. Tatthetaṃ iti vuccati –

“Na samaṇe na brāhmaṇe, na kapaṇaddhikavanibbake;
Laddhāna saṃvibhājeti, annaṃ pānaṇca bhojanaṃ;
Taṃ ve avuṭṭhikasamoti, āhu naṃ purisādhamāṃ.

“Ekaccānaṃ na dadāti, ekaccānaṃ pavecchati;
Taṃ ve padesavassīti, āhu medhāvino janā.

“Subhikkhavāco puriso, sabbabhūtānukampako;
Āmodamāno pakireti, detha dethāti bhāsati.

“Yathāpi meghe thanayitvā, gajjayitvā pavassati;
Thalaṃ ninnaṇca pūreti, abhisandantova [[abhisandantova \(?\)](#)] vārinā.

“Evameva idhekacco, puggalo hoti tādiso;
Dhammena saṃharitvāna, utthānādhigataṃ dhanāṃ;
Tappeti annapānena, sammā patte vanibbake”ti.

Ayampi attho vutto bhagavatā, iti me sutanti. Chaṭṭhaṃ.

7. Sukhapatthanāsuttaṃ

76. Vuttañhetam bhagavatā, vuttamarahatāti me sutam –

“Tñimāni, bhikkhave, sukhāni patthayamāno sīlam rakkheyya paṇḍito. Katamāni tñi? Pasamsā me āgacchatūti [āgacchantūti (syā.)] sīlam rakkheyya paṇḍito, bhogā me uppajantūti sīlam rakkheyya paṇḍito, kāyassa bhedā param maraṇā sugatiṃ saggaṃ lokaṃ upapajjissāmīti sīlam rakkheyya paṇḍito. Imāni kho, bhikkhave, tñi sukhāni patthayamāno sīlam rakkheyya paṇḍito”ti. Etamattham bhagavā avoca. Tatthetam iti vuccati –

“Sīlam rakkheyya medhāvī, patthayāno tayo sukhe;
Pasamsam vittalābhañca, pecca sagge pamodanam.

“Akarontopi ce pāpam, karontamupasevati;
Saṅkiyo hoti pāpasmim, avaṇṇo cassa rūhati.

“Yādisam kurute mittam, yādisam cūpasevati;
Sa ve tādisako hoti, sahavāso hi [sahavāsopi (sī. ka.)] tādiso.

“Sevamāno sevamānam, samphuṭṭho samphusam param;
Saro diddho kalāpaṃva, alittamupalimpati;
Upalepabhayā [upalimpabhayā (ka.)] dhīro, neva pāpasakhā siyā.

“Pūtimaccham kusaggena, yo naro upanayhati;
Kusāpi pūti vāyanti, evam bālūpasevanā.

“Tagarañca palāsena, yo naro upanayhati;
Pattāpi surabhi vāyanti, evam dhīrūpasevanā.

“Tasmā pattapuṭṭasseva [palāsapuṭṭasseva (pī. ka.)], ñatvā sampākamattano;
Asante nupaseveyya, sante seveyya paṇḍito;
Asanto nirayam nenti, santo pāpenti sugati”nti.

Ayampi attho vutto bhagavatā, iti me sutanti. Sattamam.

8. Bhidurasuttam

77. Vuttañhetam bhagavatā, vuttamarahatāti me sutam –

“Bhidurāyam [bhindantāyam (syā. pī. ka.)], bhikkhave, kāyo, viññāṇam virāgadhammam, sabbe upadhī aniccā dukkhā vipariṇāmadhammā”ti. Etamattham bhagavā avoca. Tatthetam iti vuccati –

“Kāyañca bhiduram [bhindantam (syā. pī. ka.)] ñatvā, viññāṇañca virāgunam [virāgikam (ka. sī.), pabhaṅgunam (syā.)];
Upadhīsu bhayam disvā, jātimaraṇamaccagā;
Sampatvā paramam santim, kālam kaṅkhati bhāvitatto”ti.

Ayampi attho vutto bhagavatā, iti me sutanti. Aṭṭhamam.

9. Dhātusosamsandanassuttam

78. Vuttañhetam bhagavatā, vuttamarahatāti me sutam –

“Dhātuso, bhikkhave, sattā sattehi saddhiṃ saṃsandanti samenti. Hīnādhimuttikā sattā hīnādhimuttikehi sattehi saddhiṃ saṃsandanti samenti, kalyāṇādhimuttikā sattā kalyāṇādhimuttikehi sattehi saddhiṃ saṃsandanti samenti.

“Atītampi, bhikkhave, addhānaṃ dhātusova sattā sattehi saddhiṃ saṃsandimṃsu samimṃsu. Hīnādhimuttikā sattā hīnādhimuttikehi sattehi saddhiṃ saṃsandimṃsu samimṃsu, kalyāṇādhimuttikā sattā kalyāṇādhimuttikehi sattehi saddhiṃ saṃsandimṃsu samimṃsu.

“Anāgatampi, bhikkhave, addhānaṃ dhātusova sattā sattehi saddhiṃ saṃsandissanti samessanti. Hīnādhimuttikā sattā hīnādhimuttikehi sattehi saddhiṃ saṃsandissanti samessanti, kalyāṇādhimuttikā sattā kalyāṇādhimuttikehi sattehi saddhiṃ saṃsandissanti samessanti.

“Etarahipi, bhikkhave, paccuppanaṃ addhānaṃ dhātusova sattā sattehi saddhiṃ saṃsandanti samenti. Hīnādhimuttikā sattā hīnādhimuttikehi sattehi saddhiṃ saṃsandanti samenti, kalyāṇādhimuttikā sattā kalyāṇādhimuttikehi sattehi saddhiṃ saṃsandanti samenti”’ti. Etamatthaṃ bhagavā avoca. Tatthetaṃ iti vuccati –

“Samsaggā vanatho jāto, asamsaggena chijjati;
Parittaṃ dārumāruya, yathā sīde mahaṇṇave.

“Evaṃ kusītamāgamma, sādhujiṅṅipi sīdati;
Tasmā taṃ parivajjeyya, kusītaṃ hīnavīriyaṃ.

“Pavivittehi ariyehi, pahitattehi jhāyibhi;
Niccaṃ āradhaviṅṅiyehi, paṇḍitehi sahāvase”’ti.

Ayampi attho vutto bhagavatā, iti me sutanti. Navamaṃ.

10. Parihānasuttaṃ

79. Vuttañhettaṃ bhagavatā, vuttamarahatāti me suttaṃ –

“Tayome, bhikkhave, dhammā sekhassa bhikkhuno parihānāya saṃvattanti. Katame tayo? Idha, bhikkhave, sekho bhikkhu kammārāmo hoti, kammarato, kammārāmatamanuyutto; bhassārāmo hoti, bhassarato, bhassārāmatamanuyutto; niddārāmo hoti, niddārato, niddārāmatamanuyutto. Ime kho, bhikkhave, tayo dhammā sekhassa bhikkhuno parihānāya saṃvattanti.

“Tayome, bhikkhave, dhammā sekhassa bhikkhuno aparihānāya saṃvattanti. Katame tayo? Idha, bhikkhave, sekho bhikkhu na kammārāmo hoti, na kammarato, na kammārāmatamanuyutto; na bhassārāmo hoti, na bhassarato, na bhassārāmatamanuyutto; na niddārāmo hoti, na niddārato, na niddārāmatamanuyutto. Ime kho, bhikkhave, tayo dhammā sekhassa bhikkhuno aparihānāya saṃvattanti”’ti. Etamatthaṃ bhagavā avoca. Tatthetaṃ iti vuccati –

“Kammārāmo bhassārāmo [bhassarato (sabbatha)], niddārāmo ca uddhato;
Abhabbo tādiso bhikkhu, phuṭṭhuṃ sambodhimuttamaṃ.

“Tasmā hi appakiccassa, appamiddho anuddhato;
Bhabbo so tādiso bhikkhu, phuṭṭhuṃ sambodhimuttama”’nti.

Ayampi attho vutto bhagavatā, iti me sutanti. Dasamaṃ.

Tatiyo vaggo niṭṭhito.

Tassuddānaṃ –

Dve diṭṭhī nissaraṇaṃ rūpaṃ, putto avuṭṭhikena ca;
Sukhā ca bhiduro [bhindanā (sabbattha)] dhātu, parihānena te dasāti.

4. Catutthavaggo**1. Vitakkasuttaṃ****80.** Vuttañhettaṃ bhagavatā, vuttamarahatāti me suttaṃ –

“Tayo me, bhikkhave, akusalavitakkā. Katame tayo? Anavaññattipaṭisaṃyutto vitakko, lābhasakkārasilokapaṭisaṃyutto vitakko, parānuddayatāpaṭisaṃyutto vitakko. Ime kho, bhikkhave, tayo akusalavitakkā”ti. Etamatthaṃ bhagavā avoca. Tatthettaṃ iti vuccati –

“Anavaññattisaṃyutto, lābhasakkāragāro;
Sahanandī amaccehi, āraṃ saṃyojanakkhayaṃ.

“Yo ca puttapaṇṇasaṃ hitvā, vivāhe saṃharāni [saṅgahāni (ka. sī. syā. pī.)] ca;
Bhabbo so tādiso bhikkhu, phuṭṭhuṃ sambodhimuttama”nti.

Ayampi attho vutto bhagavatā, iti me sutanti. Paṭhamam.

2. Sakkārasuttaṃ**81.** Vuttañhettaṃ bhagavatā, vuttamarahatāti me suttaṃ –

“Diṭṭhā mayā, bhikkhave, sattā sakkārena abhibhūtā, pariyādinnaṭṭā, kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapannā.

“Diṭṭhā mayā, bhikkhave, sattā asakkārena abhibhūtā, pariyādinnaṭṭā, kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapannā.

“Diṭṭhā mayā, bhikkhave, sattā sakkārena ca asakkārena ca tadubhayena abhibhūtā, pariyādinnaṭṭā, kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapannā.

“Tamaṃ kho panāhaṃ, bhikkhave, nāññassa samaṇassa vā brāhmaṇassa vā sutvā vadāmi; () [(diṭṭhā mayā bhikkhave sattā sakkārena abhibhūtā. ...pe... asakkārena abhibhūtā ...pe... sakkārena ca asakkārena ca tadubhayena abhibhūtā pariyādinnaṭṭā kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapannā.) (syā.) purimavagge micchādiṭṭhikasammādiṭṭhikasuttehi pana sameti, anvayabyatirekavākyānaṃ pana anantaritattā pāsamsatarā.]” api ca, bhikkhave, yadeva me sāmaṃ ñātaṃ sāmaṃ diṭṭhaṃ sāmaṃ viditaṃ tamevāhaṃ vadāmi.

“Diṭṭhā mayā, bhikkhave, sattā sakkārena abhibhūtā, pariyādinnaṭṭā, kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapannā.

“Diṭṭhā mayā, bhikkhave, sattā asakkārena abhibhūtā, pariyādinnaṭṭā, kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapannā.

“Diṭṭhā mayā, bhikkhave, sattā sakkārena ca asakkārena ca tadubhayena abhibhūtā,
pariyādinnaṭṭhā, kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapannā”ti.
Etamatthaṃ bhagavā avoca. Tatthetaṃ iti vuccati –

“Yassa sakkariyamānassa, asakkārena cūbhayaṃ;
Samādhi na vikampati, appamāḍavīhārino [appamāḍavīhārino (sī. aṭṭha.)].

“Taṃ jhāyinaṃ sātātikaṃ, sukhumāṃ diṭṭhivipassakaṃ;
Upādānakkhayārāmaṃ, āhu sappuriso itī”ti.

Ayampi attho vutto bhagavatā, iti me sutanti. Dutiyāṃ.

3. Devasaddasuttaṃ

82. Vuttañhetāṃ bhagavatā, vuttamarahatāti me sutāṃ –

“Tayo me, bhikkhave, devesu devasaddā niccharanti samayā samayaṃ upādāya. Katame tayo?
Yasmiṃ, bhikkhave, samaye ariyasāvako kesamassuṃ ohāretvā kāsāyāni vatthāni acchādetvā agārasmā
anagāriyaṃ pabbajjāya ceteti, tasmīṃ samaye [tasmīṃ bhikkhave samaye (pī. ka.)] devesu devasaddo
niccharati – ‘eso ariyasāvako mārena saddhiṃ saṅgāmāya ceteti’ti. Ayaṃ, bhikkhave, paṭhamo devesu
devasaddo niccharati samayā samayaṃ upādāya.

“Puna caparaṃ, bhikkhave, yasmiṃ samaye ariyasāvako sattannaṃ bodhipakkhiyānaṃ
dhammānaṃ bhāvanānuyogamanuyutto viharati, tasmīṃ samaye devesu devasaddo niccharati – ‘eso
ariyasāvako mārena saddhiṃ saṅgāmeti’ti. Ayaṃ, bhikkhave, dutiyo devesu devasaddo niccharati
samayā samayaṃ upādāya.

“Puna caparaṃ, bhikkhave, yasmiṃ samaye ariyasāvako āsavānaṃ khayā anāsavaṃ cetovimuttiṃ
paññāvimuttiṃ diṭṭheva dhamme sayāṃ abhiññā sacchikatvā upasampajja viharati, tasmīṃ samaye
devesu devasaddo niccharati – ‘eso ariyasāvako vijitasāṅgāmo tameva saṅgāmasīsaṃ abhivijjiya
ajjhāvasati’ti. Ayaṃ, bhikkhave, tatiyo devesu devasaddo niccharati samayā samayaṃ upādāya. Ime
kho, bhikkhave, tayo devesu devasaddā niccharanti samayā samayaṃ upādāya”ti. Etamatthaṃ bhagavā
avoca. Tatthetaṃ iti vuccati –

“Disvā vijitasāṅgāmaṃ, sammāsambuddhasāvakaṃ;
Devatāpi namassanti, mahantaṃ vītasāraḍaṃ.

“Namo te purisājañña, yo tvaṃ dujjayamajjhabhū;
Jevāna maccuno senaṃ, vimokkhena anāvaram.

“Iti hetāṃ namassanti, devatā pattamānaṃ;
Tañhi tassa na passanti, yena maccuvasaṃ vaje”ti.

Ayampi attho vutto bhagavatā, iti me sutanti. Tatiyāṃ.

4. Pañcapubbanimittasuttaṃ

83. Vuttañhetāṃ bhagavatā, vuttamarahatāti me sutāṃ –

“Yadā, bhikkhave, devo devakāyā cavanadhammo hoti, pañcassa pubbanimittāni pātubhavanti –

mālā milāyanti, vatthāni kilissanti, kacchehi sedā muccanti, kāye dubbaṇṇiyaṃ okkamati, sake devo devāsane nābhīramatīti. Tameṇaṃ, bhikkhave, devā ‘cavanadhammo ayaṃ devaputto’ti iti viditvā tīhi vācāhi anumodenti [anumodanti (sī. syā. pī.)] – ‘ito, bho, sugatiṃ gaccha, sugatiṃ gantvā suladdhalābhaṃ labha, suladdhalābhaṃ labhitvā suppatiṭṭhito bhavāhi’”ti.

Evam vutte, aññataro bhikkhu bhagavantaṃ etadavoca – “kinnu kho, bhante, devānaṃ sugatigamanasaṅkhātāṃ; kiñca, bhante, devānaṃ suladdhalābhasaṅkhātāṃ; kiṃ pana, bhante, devānaṃ suppatiṭṭhitasāṅkhātā”nti?

“Manussattaṃ kho, bhikkhu [bhikkhave (syā. pī.)], devānaṃ sugatigamanasaṅkhātāṃ; yaṃ manussabhūto samāno tathāgatappavedite dhammavinaye saddhaṃ paṭilabhati. Idaṃ kho, bhikkhu [bhikkhave (syā. pī.)], devānaṃ suladdhalābhasaṅkhātāṃ; sā kho panassa saddhā niviṭṭhā hoti mūlajātā patiṭṭhitā dalhā asaṃhāriyā samaṇena vā brāhmaṇena vā devena vā mārena vā brahmunā vā kenaci vā lokasmiṃ. Idaṃ kho, bhikkhu [bhikkhave (syā. pī.)], devānaṃ suppatiṭṭhitasāṅkhātā”nti. Etamatthaṃ bhagavā avoca. Tatthetaṃ iti vuccati –

“Yadā devo devakāyā, cavati āyusaṅkhayā;
Tayo saddā niccharanti, devānaṃ anumodantaṃ.

“‘Ito bho sugatiṃ gaccha, manussānaṃ saḥabyataṃ;
Manussabhūto saddhamme, labha saddhaṃ anuttaraṃ.

“‘Sā te saddhā niviṭṭhassa, mūlajātā patiṭṭhitā;
Yāvajīvaṃ asaṃhārā, saddhamme supavedite.

“‘Kāyaduccaritaṃ hitvā, vacīduccaritaṃ ca;
Manoduccaritaṃ hitvā, yañcaññaṃ dosasaṅghitaṃ.

“‘Kāyena kusalaṃ katvā, vācāya kusalaṃ bahuṃ;
Manasā kusalaṃ katvā, appamaṇaṃ nirūpadhiṃ.

“‘Tato opadhikaṃ puññaṃ, katvā dānena taṃ bahuṃ;
Aññepi macce saddhamme, brahmacariye nivesaya’ [nivesaya (sī. syā.)].

“‘Imāya anukampāya, devā devaṃ yadā vidū;
Cavantaṃ anumodenti, ehi deva punappuna’”nti.

Ayampi attho vutto bhagavatā, iti me sutanti. Catutthaṃ.

5. Bahujanahitasuttaṃ

84. Vuttañhettaṃ bhagavatā, vuttamarahatāti me suttaṃ –

“Tayome puggalā loke uppajjamānā uppajjanti bahujanahitāya bahujanasukhāya lokānukampāya atthāya hitāya sukhāya devamanussānaṃ. Katame tayo? Idha, bhikkhave, tathāgato loke uppajjati arahaṃ sammāsambuddho vijjācaraṇasampanno sugato lokavidū anuttaro purisadammasārathi satthā devamanussānaṃ buddho bhagavā. So dhammaṃ deseti ādikalyāṇaṃ majjhekalyāṇaṃ pariyośanakalyāṇaṃ sātthaṃ sabyañjanaṃ, kevalaparipuṇṇaṃ parisuddhaṃ brahmacariyaṃ pakāseti. Ayaṃ, bhikkhave, paṭhama puggalo loke uppajjamāno uppajjati bahujanahitāya bahujanasukhāya lokānukampāya atthāya hitāya sukhāya devamanussānaṃ.

“Puna caparaṃ, bhikkhave, tasseva satthu [satthuno (syā.)] sāvako araham hoti khīṇāsavo vusitavā katakaraṇīyo ohitabhāro anuppattasadattho parikkhīṇabhavasamyojano sammadaññā vimutto. So dhammaṃ deseti ādikalyāṇaṃ majjhekalyāṇaṃ pariyośanakalyāṇaṃ sātthaṃ sabyañjanaṃ, kevalaparipuṇṇaṃ parisuddhaṃ brahmacariyaṃ pakāseti. Ayaṃ, bhikkhave, dutiyo puggalo loke uppajjamāno uppajjati bahujanahitāya bahujanasukhāya lokānukampāya atthāya hitāya sukhāya devamanussānaṃ.

“Puna caparaṃ, bhikkhave, tasseva satthu sāvako sekho hoti pāṭipado bahussuto sīlavatūpapanno. Sopi [so (?)] dhammaṃ deseti ādikalyāṇaṃ majjhekalyāṇaṃ pariyośanakalyāṇaṃ sātthaṃ sabyañjanaṃ, kevalaparipuṇṇaṃ parisuddhaṃ brahmacariyaṃ pakāseti. Ayaṃ, bhikkhave, tatiyo puggalo loke uppajjamāno uppajjati bahujanahitāya bahujanasukhāya lokānukampāya atthāya hitāya sukhāya devamanussānaṃ. Ime kho, bhikkhave, tayo puggalā loke uppajjamānā uppajjanti bahujanahitāya bahujanasukhāya lokānukampāya atthāya hitāya sukhāya devamanussāna’nti. Etamatthaṃ bhagavā avoca. Tatthetaṃ iti vuccati –

“Satthā hi loke paṭhamo mahesi, tassanvayo sāvako bhāvitatto;
Athāparo pāṭipadopi sekho, bahussuto sīlavatūpapanno.

“Ete tayo devamanussasetthā, pabhaṅkarā dhammamudīrayantā;
Apāpuranti [apāpurenti (ka.)] amatassa dvāraṃ, yogā pamocenti [yāgā pamuccanti (sī.), yogā mocanti (syā.)] hujjanaṃ te.

“Ye satthavāhena anuttarena, sudesitaṃ maggamanukkamanti [maggamanuggamanti (sī. ka.)];
Idheva dukkhassa karonti antaṃ, ye appamattā sugatassa sāsane’nti.

Ayampi attho vutto bhagavatā, iti me sutanti. Pañcamaṃ.

6. Asubhānupassīsuttaṃ

85. Vuttañhetam bhagavatā, vuttamarahatāti me sutam –

“Asubhānupassī, bhikkhave, kāyasmim viharatha; ānāpānassati ca vo ajjhattaṃ parimukhaṃ sūpaṭṭhitā hotu; sabbasaṅkhāresu aniccānupassino viharatha. Asubhānupassīnaṃ, bhikkhave, kāyasmim viharataṃ yo subhāya dhātuyā rāgānusayo so pahīyati [pahīyyati (ka.)]. Ānāpānassatiyā ajjhattaṃ parimukhaṃ sūpaṭṭhitāya ye bāhirā vitakkāsāyā vighātapakkhikā, te na honti. Sabbasaṅkhāresu aniccānupassīnaṃ viharataṃ yā avijjā sā pahīyati, yā vijjā sā uppajjati’nti. Etamatthaṃ bhagavā avoca. Tatthetaṃ iti vuccati –

“Asubhānupassī kāyasmim, ānāpāne paṭissato;
Sabbasaṅkhārasamathaṃ, passaṃ ātāpi sabbadā.

“Sa ve sammaddaso bhikkhu, yato tattha vimuccati;
Abhiññāvosito santo, sa ve yogātigo munī’nti.

Ayampi attho vutto bhagavatā, iti me sutanti. Chaṭṭhaṃ.

7. Dhammānudhammapaṭipannasuttaṃ

86. Vuttañhetam bhagavatā, vuttamarahatāti me sutam –

“Dhammānudhammapaṭipannassa bhikkhuno ayamanudhammo hoti veyyākaraṇāya – dhammānudhammapaṭipannoyanti bhāsamāno dhammaññeva bhāsati no adhammaṃ, vitakkayamāno vā dhammavitakkaññeva vitakketi no adhammavitakkaṃ, tadubhayaṃ vā pana abhinivejjetvā upekkhako viharati sato sampajāno”ti. Etamatthaṃ bhagavā avoca. Tatthetaṃ iti vuccati –

“Dhammārāmo dhammarato, dhammaṃ anuvicintayaṃ;
Dhammaṃ anussaraṃ bhikkhu, saddhammā na parihāyati.

“Caraṃ vā yadi vā tiṭṭhaṃ, nisinno uda vā sayamaṃ;
Ajjhattaṃ samayaṃ cittaṃ, santimevādhigacchati”ti.

Ayampi attho vutto bhagavatā, iti me sutanti. Sattamaṃ.

8. Andhakaraṇasuttaṃ

87. Vuttañhettaṃ bhagavatā, vuttamarahatāti me suttaṃ –

“Tayome, bhikkhave, akusalavitakkā andhakaraṇā acakkhukaraṇā aññāṇakaraṇā paññānirodhikā vighātapakkhikā anibbānasamvattanikā. Katame tayo? Kāmaṃvitakko, bhikkhave, andhakaraṇo acakkhukaraṇo aññāṇakaraṇo paññānirodhiko vighātapakkhiko anibbānasamvattaniko. Byāpādavitakko, bhikkhave, andhakaraṇo acakkhukaraṇo aññāṇakaraṇo paññānirodhiko vighātapakkhiko anibbānasamvattaniko. Vihimsāvitakko, bhikkhave, andhakaraṇo acakkhukaraṇo aññāṇakaraṇo paññānirodhiko vighātapakkhiko anibbānasamvattaniko. Ime kho, bhikkhave, tayo akusalavitakkā andhakaraṇā acakkhukaraṇā aññāṇakaraṇā paññānirodhikā vighātapakkhikā anibbānasamvattanikā.

“Tayome, bhikkhave, kusalavitakkā anandhakaraṇā cakkhukaraṇā ñāṇakaraṇā paññāvuddhikā avighātapakkhikā nibbānasamvattanikā. Katame tayo? Nekkhammavitakko, bhikkhave, anandhakaraṇo cakkhukaraṇo ñāṇakaraṇo paññāvuddhiko avighātapakkhiko nibbānasamvattaniko. Abyāpādavitakko, bhikkhave, anandhakaraṇo cakkhukaraṇo ñāṇakaraṇo paññāvuddhiko avighātapakkhiko nibbānasamvattaniko. Avihimsāvitakko, bhikkhave, anandhakaraṇo cakkhukaraṇo ñāṇakaraṇo paññāvuddhiko avighātapakkhiko nibbānasamvattaniko. Ime kho, bhikkhave, tayo kusalavitakkā anandhakaraṇā cakkhukaraṇā ñāṇakaraṇā paññāvuddhikā avighātapakkhikā nibbānasamvattanikā”ti. Etamatthaṃ bhagavā avoca. Tatthetaṃ iti vuccati –

“Tayo vitakke kusale vitakkaye, tayo pana akusale nirākare;
Sa ve vitakkāni vicāritāni, sameti vuṭṭhīva rajaṃ samūhataṃ;
Sa ve vitakkūpasamena cetasā, idheva so santipadaṃ samajjhagā”ti.

Ayampi attho vutto bhagavatā, iti me sutanti. Aṭṭhamaṃ.

9. Antarāmalasuttaṃ

88. Vuttañhettaṃ bhagavatā, vuttamarahatāti me suttaṃ –

“Tayome, bhikkhave, antarāmalā antarāmittā antarāsapattā antarāvadhakā antarāpaccatthikā. Katame tayo? Lobho, bhikkhave, antarāmalā antarāmittā antarāsapattā antarāvadhako antarāpaccatthiko. Doso, bhikkhave, antarāmalā antarāmittā antarāsapattā antarāvadhako antarāpaccatthiko. Moho, bhikkhave, antarāmalā antarāmittā antarāsapattā antarāvadhako antarāpaccatthiko. Ime kho, bhikkhave, tayo antarāmalā antarāmittā antarāsapattā antarāvadhakā antarāpaccatthikā”ti. Etamatthaṃ bhagavā avoca. Tatthetaṃ iti vuccati –

“Anatthajanano lobho, lobho cittappakopano;
Bhayamantarato jātaṃ, taṃ jano nāvabujjhati.

“Luddho atthaṃ na jānāti, luddho dhammaṃ na passati;
Andhatamaṃ [andhaṃ tamaṃ (sī.)] tadā hoti, yaṃ lobho sahate naraṃ.

“Yo ca lobhaṃ pahantvāna, lobhaneyye na lubbhati;
Lobho pahīyate tamhā, udabindūva pokkharā.

“Anatthajanano doso, doso cittappakopano;
Bhayamantarato jātaṃ, taṃ jano nāvabujjhati.

“Duṭṭho atthaṃ na jānāti, duṭṭho dhammaṃ na passati;
Andhatamaṃ tadā hoti, yaṃ doso sahate naraṃ.

“Yo ca dosaṃ pahantvāna, dosaneyye na dussati;
Doso pahīyate tamhā, tālapakkaṃva bandhanā.

“Anatthajanano moho, moho cittappakopano;
Bhayamantarato jātaṃ, taṃ jano nāvabujjhati.

“Mūlho atthaṃ na jānāti, mūlho dhammaṃ na passati;
Andhatamaṃ tadā hoti, yaṃ moho sahate naraṃ.

“Yo ca mohaṃ pahantvāna, mohaneyye na muyhati;
Moḥaṃ vihanti so sabbaṃ, ādiccovudayaṃ tama’nti.

Ayampi attho vutto bhagavatā, iti me sutanti. Navamaṃ.

10. Devadattasuttaṃ

89. Vuttañhettaṃ bhagavatā, vuttamarahatāti me suttaṃ –

“Tīhi, bhikkhave, asaddhammehi abhibhūto pariyādinnaṃ devadatto āpāyiko nerayiko kappatṭho atekiccho. Katamehi tīhi? Pāpicchatāya, bhikkhave, abhibhūto pariyādinnaṃ devadatto āpāyiko nerayiko kappatṭho atekiccho. Pāpamittatāya, bhikkhave, abhibhūto pariyādinnaṃ devadatto āpāyiko nerayiko kappatṭho atekiccho. Sati kho pana uttarikaraṇīye [uttariṃ karaṇīye (syā.)] oramattakena visesādhigamena [visesādhigamena ca (syā. pī.)] antarā vosānaṃ āpādi. Imehi kho, bhikkhave, tīhi asaddhammehi abhibhūto pariyādinnaṃ devadatto āpāyiko nerayiko kappatṭho atekiccho’nti. Etamatthaṃ bhagavā avoca. Tatthettaṃ iti vuccati –

“Mā jātu koci lokasmiṃ, pāpiccho udapajjatha;
Tadamināpi jānātha, pāpicchānaṃ yathā gati.

“Paṇḍitoti samaññāto, bhāvitattoti sammato;
Jalaṃva yasaṃ aṭṭhā, devadattoti vissuto [me suttaṃ (pāḷiyamaṃ)].

“So pamāṇamanuciṇṇo [pamāḍamanuciṇṇo (ka. sī. syā. pī.), samāṇamanuciṇṇo (aṭṭha.)],
āsajja naṃ tathāgataṃ;
Avācinirayaṃ patto, catudvāraṃ bhayānakaṃ.

“Aduṭṭhassa hi yo dubbhe, pāpakammaṃ akubbato;
Tameva pāpaṃ phusati [phusseti (syā.)], duṭṭhacittaṃ anādaraṃ.

“Samuddaṃ visakumbhena, yo maññeyya padūsitum;
Na so tena padūseyya, bhesmā hi udadhi mahā.

“Evameva [evametaṃ (syā.)] tathāgataṃ, yo vādena vihiṃsati;
Sammaggaṃ [samaggataṃ (sī. ka.)] santacittaṃ, vādo tamhi na rūhati.

“Tādisaṃ mittaṃ kubbetha, tañca seveyya paṇḍito;
Yassa maggānugo bhikkhu, khayaṃ dukkhassa pāpuṇe’ ti.

Ayampi attho vutto bhagavatā, iti me sutanti. Dasamaṃ.

Catuttho vaggo niṭṭhito.

Tassuddānaṃ –

Vitakkāsakkārasadda, cavanaloke asubhaṃ;
Dhammaandhakāramalaṃ, devadattena te dasāti.

5. Pañcamavaggo

1. Aggappasādasuttaṃ

90. Vuttañhettaṃ bhagavatā, vuttamarahatāti me suttaṃ –

“Tayome, bhikkhave, aggappasādā. Katame tayo? Yāvata, bhikkhave, sattā apadā vā dvipadā vā catuppadā vā bahuppadā [bahupadā (ka.)] vā rūpino vā arūpino vā saññino vā asaññino vā nevasaññināsaññino vā, tathāgato tesaṃ aggamakkhāyati arahaṃ sammāsambuddho. Ye, bhikkhave, buddhe pasannā, agge te pasannā. Agge kho pana pasannānaṃ aggo vipāko hoti.

“Yāvata, bhikkhave, dhammā saṅkhatā vā asaṅkhatā vā, virāgo tesaṃ aggamakkhāyati, yadidaṃ madanimmadano pipāsavinayo ālayasamugghāto vaṭṭupacchedo taṇhakkhayo virāgo nirodho nibbānaṃ. Ye, bhikkhave, virāge dhamme pasannā, agge te pasannā. Agge kho pana pasannānaṃ aggo vipāko hoti.

“Yāvata, bhikkhave, saṅghā vā gaṇā vā, tathāgatasāvakaṅgho tesaṃ aggamakkhāyati, yadidaṃ cattāri purisayugāni aṭṭha purisapuggalā esa bhagavato sāvakaṅgho āhuneyyo pāhuneyyo dakkhiṇeyyo añjalikaraṇīyo anuttaraṃ puññakkhettaṃ lokassa. Ye, bhikkhave, saṅghe pasannā, agge te pasannā. Agge kho pana pasannānaṃ aggo vipāko hoti. Ime kho, bhikkhave, tayo aggappasādā’ ti. Etamatthaṃ bhagavā avoca. Tatthetaṃ iti vuccati –

“Aggato ve pasannānaṃ, aggaṃ dhammaṃ vijānataṃ;
Agge buddhe pasannānaṃ, dakkhiṇeyye anuttare.

“Agge dhamme pasannānaṃ, virāgūpasame sukhe;
Agge saṅghe pasannānaṃ, puññakkhette anuttare.

“Aggasmim dānaṃ dadataṃ, aggaṃ puññaṃ pavaḍḍhati;
Aggaṃ āyu ca vaṇṇo ca, yaso kitti sukhaṃ balaṃ.

“Aggassa dātā medhāvī, aggadhammasamāhito;
Devabhūto manusso vā, aggappatto pamodatī”ti.

Ayampi attho vutto bhagavatā, iti me sutanti. Paṭhamam.

2. Jīvikasuttaṃ

91. Vuttañhetam bhagavatā, vuttamarahatāti me sutam –

“Antamidaṃ, bhikkhave, jīvikānaṃ yadidaṃ piṇḍolyaṃ. Abhisāpoyaṃ [[abhisāpāyaṃ \(sī.\)](#), [abhilāpāyaṃ \(syā. pī.\)](#), [abhisāpāyaṃ \(ka.\)](#)], bhikkhave, lokasmiṃ – ‘piṇḍolo vicarasi pattapāṇī’ti. Tañca kho etaṃ, bhikkhave, kulaputtā upenti atthavasikā, atthavaṣaṃ paṭicca; neva rājābhiniṭā, na corābhiniṭā, na iṇaṭṭā, na bhayaṭṭā, na ājīvikāpakatā. Api ca kho ‘otiṇṇamhā jātiyā jarāya maraṇena sokehi paridevehi dukkhehi domanassehi upāyāsehi dukkhotiṇṇā dukkhaparetā, appeva nāma imassa kevalassa dukkhakkhandhassa antakiriya paññāyethā’ti. Evaṃ pabbajito cāyaṃ, bhikkhave, kulaputto so ca hoti abhijjhālu kāmesu tibbasārāgo, byāpannacitto paduṭṭhamanasāṅkappo, muṭṭhassati asampajāno asamāhito vibbhantacitto pākatindriyo. Seyyathāpi, bhikkhave, chavālātaṃ ubhatopadittaṃ majjhe gūthagataṃ neva gāme kaṭṭhatthaṃ pharati na araññe: tathūpamāhaṃ, bhikkhave, imaṃ puggalaṃ vadāmi gihibhogā parihīno sāmāññatthañca na paripūreti”ti. Etamatthaṃ bhagavā avoca. Tatthetaṃ iti vuccati –

“Gihibhogā parihīno, sāmāññatthañca dubbhago;
Paridhammamāno pakireti, chavālātaṃva nassati.

“Kāsāvakaṇṭhā bahavo, pāpadhammā asaññatā;
Pāpā pāpehi kammehi, nirayaṃ te upapajjare.

“Seyyo ayogulo bhutto, tatto aggisikhūpamo;
Yañce bhuñjeyya dussīlo, raṭṭhapiṇḍamasaññato”ti.

Ayampi attho vutto bhagavatā, iti me sutanti. Dutiyam.

3. Saṅghāṭikaṇṇasuttaṃ

92. Vuttañhetam bhagavatā, vuttamarahatāti me sutam –

“Saṅghāṭikaṇṇe cepi, bhikkhave, bhikkhu gahetvā piṭṭhito piṭṭhito anubandho assa pāde pādaṃ nikkhipanto, so ca hoti abhijjhālu kāmesu tibbasārāgo byāpannacitto paduṭṭhamanasāṅkappo muṭṭhassati asampajāno asamāhito vibbhantacitto pākatindriyo; atha kho so ārakāva mayhaṃ, ahañca tassa. Taṃ kissa hetu? Dhammañhi so, bhikkhave, bhikkhu na passati. Dhammaṃ apassanto na maṃ passati [[maṃ na passati \(syā.\)](#)].

“Yojanasate cepi so, bhikkhave, bhikkhu vihareyya. So ca hoti anabhijjhālu kāmesu na tibbasārāgo abyāpannacitto apaduṭṭhamanasāṅkappo upaṭṭhitassati sampajāno samāhito ekaggacitto saṃvutindriyo; atha kho so santikeva mayhaṃ, ahañca tassa. Taṃ kissa hetu? Dhammaṃ hi so, bhikkhave, bhikkhu passati; dhammaṃ passanto maṃ passatī”ti. Etamatthaṃ bhagavā avoca. Tatthetaṃ iti vuccati –

“Anubandhopi ce assa, mahiccho ca vighātavā;
Ejānugo anejassa, nibbutassa anibbuto;
Giddho so vītagedhassa, passa yāvañca ārakā.

“Yo ca dhammamabhiññāya, dhammamaññāya paṇḍito;
Rahadova nivāte ca, anejo vūpasammati.

“Anejo so anejassa, nibbutassa ca nibbuto;
Agiddho vītagedhassa, passa yāvañca santike”’ti.

Ayampi attho vutto bhagavatā, iti me sutanti. Tatiyaṃ.

4. Aggisuttaṃ

93. Vuttañhettaṃ bhagavatā, vuttamarahatāti me suttaṃ –

“Tayome, bhikkhave, aggī. Katame tayo? Rāgaggi, dosaggi, mohaggi – ime kho, bhikkhave, tayo aggī”’ti. Etamatthaṃ bhagavā avoca. Tatthettaṃ iti vuccati –

“Rāgaggi dahati macce, ratte kāmesu mucchite;
Dosaggi pana byāpanne, nare paṇātipātino.

“Mohaggi pana sammūḷhe, ariyadhamme akovide;
Ete aggī ajānantā, sakkāyābhiratā pajā.

“Te vaḍḍhayanti nirayaṃ, tiracchānañca yoniyo;
Asuraṃ pettivisayaṃ, amuttā mārabandhanā.

“Ye ca rattindivā yuttā, sammāsambuddhasāsane;
Te nibbāpentī rāgaggiṃ, niccaṃ asubhasaññino.

“Dosaggiṃ pana mettāya, nibbāpentī naruttamā;
Mohaggiṃ pana paññāya, yāyaṃ nibbedhagāminī.

“Te nibbāpetvā nipakā, rattindivamatanditā;
Asesaṃ parinibbanti, asesaṃ dukkhamaccagaṃ.

“Ariyaddasā vedaguno, sammadaññāya paṇḍitā;
Jātikkhayaṃ abhiññāya, nāgacchantī punabbhava”’nti.

Ayampi attho vutto bhagavatā, iti me sutanti. Catutthaṃ.

5. Upaparikkhasuttaṃ

94. Vuttañhettaṃ bhagavatā, vuttamarahatāti me suttaṃ –

“Tathā tathā, bhikkhave, bhikkhu upaparikkheyya yathā yathāssa [yathā yathā (bahūsu)]
upaparikkhato bahiddhā cassa viññāṇaṃ avikkhittaṃ avisaṭṭaṃ ajjhattaṃ asaṅghitaṃ anupādāya na
paritasseyya. Bahiddhā, bhikkhave, viññāṇe avikkhite avisaṭṭe sati ajjhattaṃ asaṅghite anupādāya
aparitasato āyatīṃ jātijarāmarañadukkhāsamudayasambhavo na hotī”’ti. Etamatthaṃ bhagavā avoca.
Tatthettaṃ iti vuccati –

“Sattasaṅgappahīnassa, netticchinnassa bhikkhuno;
Vikkhīṇo jātisamsāro, natthi tassa punabbhavo”’ti.

Ayampi attho vutto bhagavatā, iti me sutanti. Pañcamaṃ.

6. Kāmūpapattisuttaṃ

95. Vuttañhettaṃ bhagavatā, vuttamarahatāti me suttaṃ –

“Tisso imā, bhikkhave, kāmūpapattiyo [kāmuppattiyo (sī.)]. Katamā tisso? Paccupaṭṭhitakāmā, nimmānaratino, paranimmitavasavattino – imā kho, bhikkhave, tisso kāmūpapattiyo”ti. Etamatthaṃ bhagavā avoca. Tatthettaṃ iti vuccati –

“Paccupaṭṭhitakāmā ca, ye devā vasavattino;
Nimmānaratino devā, ye caññe kāmabhogino;
Itthabhāvaññathābhāvaṃ, saṃsāraṃ nātivattare.

“Etamādīnavaṃ ñatvā, kāmabhogesu paṇḍito;
Sabbe pariccaje kāme, ye dibbā ye ca mānūsā.

“Piyarūpasātagadhitaṃ, chetvā sottaṃ duraccayaṃ;
Asesaṃ parinibbanti, asesaṃ dukkhamaccagaṃ.

“Ariyaddasā vedaguno, sammadaññāya paṇḍitā;
Jātikkhayamabhiññāya, nāgacchanti punabbhava”nti.

Ayampi attho vutto bhagavatā, iti me sutanti. Chaṭṭhaṃ.

7. Kāmayogasuttaṃ

96. Vuttañhettaṃ bhagavatā, vuttamarahatāti me suttaṃ –

“Kāmayogayutto, bhikkhave, bhavayogayutto āgāmī hoti āgantā [āgantvā (syā. ka.)] itthattaṃ. Kāmayogavisamyutto, bhikkhave, bhavayogayutto anāgāmī hoti anāgantā itthattaṃ. Kāmayogavisamyutto, bhikkhave, bhavayogavisamyutto arahā hoti, khīṇāsavo”ti. Etamatthaṃ bhagavā avoca. Tatthettaṃ iti vuccati –

“Kāmayogena samyuttā, bhavayogena cūbhayaṃ;
Sattā gacchanti saṃsāraṃ, jātimaraṇagāmīno.

“Ye ca kāme pahantvāna, appattā āsavakkhayaṃ;
Bhavayogena samyuttā, anāgāmīti vuccare.

“Ye ca kho chinnaśaṃsayā, khīṇamānapunabbhavā;
Te ve pārāṅgatā loke, ye pattā āsavakkhaya”nti.

Ayampi attho vutto bhagavatā, iti me sutanti. Sattamaṃ.

Kalyāṇasīlasuttaṃ

97. Vuttañhettaṃ bhagavatā, vuttamarahatāti me suttaṃ –

“Kalyāṇasīlo, bhikkhave, bhikkhu kalyāṇadhammo kalyāṇapañño imasmiṃ dhammavinaye ‘kevalī

vusitavā uttamapuriso'ti vuccati –

“Kathañca, bhikkhave, bhikkhu kalyāṇasīlo hoti? Idha, bhikkhave, bhikkhu sīlavā hoti, pātimokkhasaṃvarasaṃvuto viharati, ācāragocarasaṃpanno aṇumattesu vajjesu bhayadassāvī, samādāya sikkhati sikkhāpadesu. Evaṃ kho, bhikkhave, bhikkhu kalyāṇasīlo hoti. Iti kalyāṇasīlo.

“Kalyāṇadhammo ca kathaṃ hoti? Idha, bhikkhave, bhikkhu sattannaṃ bodhipakkhiyānaṃ dhammānaṃ bhāvanānuyogamanuyutto viharati. Evaṃ kho, bhikkhave, bhikkhu kalyāṇadhammo hoti. Iti kalyāṇasīlo, kalyāṇadhammo.

“Kalyāṇapañño ca kathaṃ hoti? Idha, bhikkhave, bhikkhu āsavānaṃ khayā anāsavaṃ cetovimuttiṃ paññāvimuttiṃ diṭṭheva dhamme sayāṃ abhiññā sacchikatvā upasampajja viharati. Evaṃ kho, bhikkhave, bhikkhu kalyāṇapañño hoti.

“Iti kalyāṇasīlo kalyāṇadhammo kalyāṇapañño imasmiṃ dhammavinaye ‘kevalī vusitavā uttamapuriso'ti vuccatī’ ti. Etamatthaṃ bhagavā avoca. Tatthetaṃ iti vuccati –

“Yassa kāyena vācāya, manasā natthi dukkaṭaṃ;
Taṃ ve kalyāṇasīloti, āhu bhikkhuṃ hirīmanaṃ [hirīmataṃ (syā. ka.)].

“Yassa dhammā subhāvitā, satta [patta (sabbattha)] sambodhigāmino;
Taṃ ve kalyāṇadhammoti, āhu bhikkhuṃ anussadaṃ.

“Yo dukkhassa pajānāti, idheva khayamattano;
Taṃ ve kalyāṇapaññoti, āhu bhikkhuṃ anāsavaṃ.

“Tehi dhammehi sampannaṃ, anīghaṃ chinnaṃsayāṃ;
Asitaṃ sabbalokassa, āhu sabbapahāyina’nti.

Ayampi attho vutto bhagavatā, iti me sutanti. Aṭṭhamāṃ.

9. Dānasuttaṃ

98. Vuttañhettaṃ bhagavatā, vuttamarahatāti me sutāṃ –

“Dvemāni, bhikkhave, dānāni – āmisadānañca dhammadānañca. Etadaggaṃ, bhikkhave, imesaṃ dvinnaṃ dānaṃ yadidaṃ – dhammadānaṃ.

“Dveme, bhikkhave, saṃvibhāgā – āmisasaṃvibhāgo ca dhammasaṃvibhāgo ca. Etadaggaṃ, bhikkhave, imesaṃ dvinnaṃ saṃvibhāgānaṃ yadidaṃ – dhammasaṃvibhāgo.

“Dveme, bhikkhave, anuggahā – āmisānuggaho ca dhammānuggaho ca. Etadaggaṃ, bhikkhave, imesaṃ dvinnaṃ anuggahānaṃ yadidaṃ – dhammānuggaho’ ti. Etamatthaṃ bhagavā avoca. Tatthetaṃ iti vuccati –

“Yamāhu dānaṃ paramaṃ anuttaraṃ, yaṃ saṃvibhāgaṃ bhagavā avaṇṇayi [avaṇṇayī (sī.)];
Aggamhi khattamhi pasannacitto, viññū pajānaṃ ko na yajetha kāle.

“Ye ceva bhāsanti suṇanti cūbhayaṃ, pasannacittā sugatassa sāsane;
Tesaṃ so attho paramo visujjhati, ye appamattā sugatassa sāsane’ ti.

Ayampi attho vutto bhagavatā, iti me sutanti. Navamaṃ.

10. Tevijjasuttaṃ

99. Vuttañhetamaṃ bhagavatā, vuttamarahatāti me sutamaṃ –

“Dhammenāhaṃ, bhikkhave, tevijjamaṃ brāhmaṇamaṃ paññāpemi, nāññaṃ lapitalāpanamattena.

“Kathañcāhaṃ, bhikkhave, dhammena tevijjamaṃ brāhmaṇamaṃ paññāpemi, nāññaṃ lapitalāpanamattena? Idha, bhikkhave, bhikkhu anekavihitamaṃ pubbenivāsaṃ anussarati, seyyathidaṃ – ekampi jātiṃ dvepi jātiyo tissopi jātiyo catassopi jātiyo pañcapi jātiyo dasapi jātiyo vīsampi jātiyo tiṃsampi jātiyo cattālīsampi jātiyo paññāsampi jātiyo jātisatampi jātisahassampi jātisatasahassampi anekepi samvaṭṭakappe anekepi vivaṭṭakappe anekepi samvaṭṭavivaṭṭakappe – ‘amutrāsimaṃ evaṃnāmo evaṃgotto evaṃvaṇṇo evamāhāro evaṃsukhadukkhappaṭisaṃvedī evamāyupariyanto. So tato cuto amutra udapādiṃ. Tatrāpāsimaṃ evaṃnāmo evaṃgotto evaṃvaṇṇo evamāhāro evaṃsukhadukkhappaṭisaṃvedī evamāyupariyanto. So tato cuto idhūpapanno’ ti. Iti sākāraṃ sauddesaṃ anekavihitamaṃ pubbenivāsaṃ anussarati. Ayamassa paṭhamā vijjā adhigatā hoti, avijjā vihatā, vijjā uppannā, tamo vihato, āloko uppanno, yathā taṃ appamattassa ātāpino pahitattassa viharato.

“Puna capamaṃ, bhikkhave, bhikkhu dibbena cakkhunā visuddhena atikkantamānusakena satte passati cavamāne upapajjamāne hīne pañite suvaṇṇe dubbaṇṇe, sugate duggate yathākammūpage satte pajānāti – ‘ime vata bhonto sattā kāyaduccaritena samannāgatā vacīduccaritena samannāgatā manoduccaritena samannāgatā ariyānaṃ upavādakā micchādiṭṭhikā micchādiṭṭhikammasamādānā. Te kāyassa bhedaṃ paraṃ maraṇā apāyamaṃ duggatiṃ vinipātaṃ nirayaṃ upapannā. Ime vā pana bhonto sattā kāyasucaritena samannāgatā vacīsucaritena samannāgatā manosucaritena samannāgatā ariyānaṃ anupavādakā sammādiṭṭhikā sammādiṭṭhikammasamādānā. Te kāyassa bhedaṃ paraṃ maraṇā sugatiṃ saggamaṃ lokamaṃ upapannā’ ti. Iti dibbena cakkhunā visuddhena atikkantamānusakena satte passati cavamāne upapajjamāne hīne pañite suvaṇṇe dubbaṇṇe, sugate duggate yathākammūpage satte pajānāti. Ayamassa dutiyā vijjā adhigatā hoti, avijjā vihatā, vijjā uppannā, tamo vihato, āloko uppanno, yathā taṃ appamattassa ātāpino pahitattassa viharato.

“Puna capamaṃ, bhikkhave, bhikkhu āsavānaṃ khayā anāsavaṃ cetovimuttiṃ paññāvimuttiṃ diṭṭheva dhamme sayamaṃ abhiññā sacchikatvā upasampajja viharati. Ayamassa tatiyā vijjā adhigatā hoti, avijjā vihatā, vijjā uppannā, tamo vihato, āloko uppanno, yathā taṃ appamattassa ātāpino pahitattassa viharato. Evaṃ kho ahaṃ, bhikkhave, dhammena tevijjamaṃ brāhmaṇamaṃ paññāpemi, nāññaṃ lapitalāpanamattena’ ti. Etamatthamaṃ bhagavā avoca. Tatthetaṃ iti vuccati –

“Pubbenivāsaṃ yovedi [[yovedi \(sabbattha\)](#)], saggāpāyañca passati;
Atha [[atha \(syā. ka.\)](#)] jātikkhayaṃ patto, abhiññāvosito muni.

“Etāhi tīhi vijjāhi, tevijjo hoti brāhmaṇo;
Tamahaṃ vadāmi tevijjamaṃ, nāññaṃ lapitalāpana’ nti.

Ayampi attho vutto bhagavatā, iti me sutanti. Dasamaṃ.

Pañcamaṃ vaggero niṭṭhito.

Tassuddānaṃ –

Pasāda jīvita saṅghāti, aggi upaparikkhaya;
Upapatti [[uppatti \(sī.\)](#)] kāma kalyāṇamaṃ, dānaṃ dhammena te dasāti.

Tikanipāto niṭṭhito.

4. Catukkanipāto

1. Brāhmaṇadhammayāgasuttaṃ

100. Vuttañhettaṃ bhagavatā, vuttamarahatāti me suttaṃ –

“Ahamasmi, bhikkhave, brāhmaṇo yācayogo sadā payatapāṇi [[payatapāṇī \(sī. syā.\)](#)] antimadehadharo anuttaro bhisakko sallakatto. Tassa me tumhe puttā orasā mukhato jātā dhammajā dhammanimmitā dhammadāyādā, no āmisadāyādā.

“Dvemāni, bhikkhave, dānāni – āmisadānañca dhammadānañca. Etadaggaṃ, bhikkhave, imesaṃ dvinnaṃ dānānaṃ yadidaṃ – dhammadānaṃ.

“Dveme, bhikkhave, saṃvibhāgā – āmisasaṃvibhāgo ca dhammasaṃvibhāgo ca. Etadaggaṃ, bhikkhave, imesaṃ dvinnaṃ saṃvibhāgānaṃ yadidaṃ – dhammasaṃvibhāgo.

“Dveme, bhikkhave, anuggahā – āmisānuggaho ca dhammānuggaho ca. Etadaggaṃ, bhikkhave, imesaṃ dvinnaṃ anuggahānaṃ yadidaṃ – dhammānuggaho.

“Dveme, bhikkhave, yāgā – āmisayāgo ca dhammayāgo ca. Etadaggaṃ, bhikkhave, imesaṃ dvinnaṃ yāgānaṃ yadidaṃ – dhammayāgo”ti. Etamatthaṃ bhagavā avoca. Tatthettaṃ iti vuccati –

“Yo dhammayāgaṃ ayajī amaccharī, tathāgato sabbabhūtānukampī [[sabbasattānukampī \(syā.\) aṭṭhakathāyampi](#)];
Tattha tādisaṃ devamanussasetthaṃ, sattā namassanti bhavassa pāragu”nti.

Ayampi attho vutto bhagavatā, iti me sutanti. Paṭhamam.

2. Sulabhasuttaṃ

101. Vuttañhettaṃ bhagavatā, vuttamarahatāti me suttaṃ –

“Cattārimāni, bhikkhave, appāni ceva sulabhāni ca, tāni ca anavajjāni. Katamāni cattāri? Paṃsukūlaṃ, bhikkhave, cīvarānaṃ appaṇca sulabhañca, tañca anavajjaṃ. Piṇḍiyālopo, bhikkhave, bhojanānaṃ appaṇca sulabhañca, tañca anavajjaṃ. Rukkhamūlaṃ, bhikkhave, senāsanānaṃ appaṇca sulabhañca, tañca anavajjaṃ. Pūtimuttaṃ, bhikkhave, bhesajjānaṃ appaṇca sulabhañca tañca anavajjaṃ. Imāni kho, bhikkhave, cattāri appāni ceva sulabhāni ca, tāni ca anavajjāni. Yato kho, bhikkhave, bhikkhu appena ca tuṭṭho hoti sulabhena ca (anavajjena ca) [[\(...\) natthi sī. pī. ka. potthakesu ca ānguttare ca](#)], imassāhaṃ aññataraṃ sāmāññaṅganti vadāmi”ti. Etamatthaṃ bhagavā avoca. Tatthettaṃ iti vuccati –

“Anavajjena tuṭṭhassa, appena sulabhena ca;
Na senāsanamārabbha, cīvaraṃ pānabhojanaṃ;
Vighāto hoti cittassa, disā nappaṭihaññati.

“Ye cassa [[yepassa \(syā.\)](#)] dhammā akkhātā, sāmāññassānulomikā;
Adhiggahitā tuṭṭhassa, appamattassa bhikkhuno”ti [[sikkhatoti \(sī. ka.\)](#)].

Ayampi attho vutto bhagavatā, iti me sutanti. Dutiyam.

3. Āsavakkhayasuttam

102. Vuttañhetam bhagavatā, vuttamarahatāti me sutam –

“Jānatoham, bhikkhave, passato āsavānam khayam vadāmi, no ajānato no apassato. Kiñca, bhikkhave, jānato, kiṃ passato āsavānam khayoti? Idam dukkhanti, bhikkhave, jānato passato āsavānam khayoti. Ayam dukkhasamudayoti, bhikkhave, jānato passato āsavānam khayoti. Ayam dukkhanirodhoti, bhikkhave, jānato passato āsavānam khayoti. Ayam dukkhanirodhagāminī paṭipadāti, bhikkhave, jānato passato āsavānam khayoti. Evam kho, bhikkhave, jānato evam passato āsavānam khayoti”ti. Etamattham bhagavā avoca. Tatthetam iti vuccati –

“Sekhassa sikkhamānassa, ujumaggānusārino;
Khayasmim paṭhamam ñānam, tato aññā anantarā.

“Tato aññā vimuttassa, vimuttiññānamuttamam;
Uppajjati khaye ñānam, khīṇā samyojanā iti.

“Na tvevidam kusītena, bālenamavijānatā;
Nibbānam adhigantabbam, sabbaganthappamocana”’nti.

Ayampi attho vutto bhagavatā, iti me sutanti. Tatiyam.

4. Samaṇabrāhmaṇasuttam

103. Vuttañhetam bhagavatā, vuttamarahatāti me sutam –

“Ye hi keci, bhikkhave, samaṇā vā brāhmaṇā vā ‘idam dukkha’nti yathābhūtam nappajānanti; ‘ayam dukkhasamudayo’ti yathābhūtam nappajānanti; ‘ayam dukkhanirodho’ti yathābhūtam nappajānanti; ‘ayam dukkhanirodhagāminī paṭipadā’ti yathābhūtam nappajānanti – na me te, bhikkhave, samaṇā vā brāhmaṇā vā samaṇesu vā samaṇasammatā brāhmaṇesu vā brāhmaṇasammatā, na ca panete āyasmanto sāmāññattham vā brahmaññattham vā diṭṭheva dhamme sayam abhiññā sacchikatvā upasampajja viharanti.

“Ye ca kho keci, bhikkhave, samaṇā vā brāhmaṇā vā ‘idam dukkha’nti yathābhūtam pajānanti; ‘ayam dukkhasamudayo’ti yathābhūtam pajānanti; ‘ayam dukkhanirodho’ti yathābhūtam pajānanti; ‘ayam dukkhanirodhagāminī paṭipadā’ti yathābhūtam pajānanti – te kho me, bhikkhave, samaṇā vā brāhmaṇā vā samaṇesu ceva samaṇasammatā brāhmaṇesu ca brāhmaṇasammatā, te ca panāyasmanto sāmāññatthañca brahmaññatthañca diṭṭheva dhamme sayam abhiññā sacchikatvā upasampajja viharanti”ti. Etamattham bhagavā avoca. Tatthetam iti vuccati –

“Ye dukkham nappajānanti, atho dukkhassa sambhavam;
Yattha ca sabbaso dukkham, asesam uparujjhati;
Taṅca maggam na jānanti, dukkhūpasamagāminam.

“Cetovimuttihīnā te, atho paññāvimuttiyā;
Abhabbā te antakiriya, te ve jātijarūpagā.

“Ye ca dukkham pajānanti, atho dukkhassa sambhavam;

Yattha ca sabbaso dukkhaṃ, asesam uparujjhati;
Taṅca maggaṃ pajānanti, dukkhūpasamagāminam.

“Cetovimuttisampannā, atho paññāvimuttiyā;
Bhabbā te antakiriyāya, na te jātijarūpagā”’ti.

Ayampi attho vutto bhagavatā, iti me sutanti. Catuttham.

5. Sīlasampannasuttam

104. Vuttañhetam bhagavatā, vuttamarahatāti me sutam –

“Ye te, bhikkhave, bhikkhū sīlasampannā samādhisampannā paññāsampannā vimuttisampannā vimuttiñāṇadassanasampannā ovādakā viññāpakā sandassakā samādapakā samuttejakā sampahaṃsakā alaṃsamakkhātāro saddhammassa dassanampahaṃ, bhikkhave, tesam bhikkhūnam bahūpakāram vadāmi; savanampahaṃ, bhikkhave, tesam bhikkhūnam bahūpakāram vadāmi; upasaṅkamanampahaṃ, bhikkhave, tesam bhikkhūnam bahūpakāram vadāmi; payirupāsanampahaṃ, bhikkhave, tesam bhikkhūnam bahūpakāram vadāmi; anussaraṇampahaṃ, bhikkhave, tesam bhikkhūnam bahūpakāram vadāmi; anupabbajjampahaṃ [anussatimpahaṃ (syā.)], bhikkhave, tesam bhikkhūnam bahūpakāram vadāmi. Tam kissa hetu? Tathārūpe, bhikkhave, bhikkhū sevato bhajato payirupāsato aparipūropi sīlakkhandho bhāvanāpāripūriṃ gacchati, aparipūropi samādhikkhandho bhāvanāpāripūriṃ gacchati, aparipūropi paññākkhandho bhāvanāpāripūriṃ gacchati, aparipūropi vimuttikkhandho bhāvanāpāripūriṃ gacchati, aparipūropi vimuttiñāṇadassanakkhandho bhāvanāpāripūriṃ gacchati. Evarūpā ca te, bhikkhave, bhikkhū satthārotipi vuccanti, satthavāhātipi vuccanti, raṇaṇjahātipi vuccanti, tamonudātipi vuccanti, ālokarātīpi vuccanti, obhāsakarātīpi vuccanti, pajjotakarātīpi vuccanti, ukkādhārātīpi vuccanti, pabhaṅkarātīpi vuccanti, ariyātīpi vuccanti, cakkhumantotīpi vuccantī”’ti. Etamattham bhagavā avoca. Tatthetam iti vuccati –

“Pāmojjakaraṇam ṭhānam [... karaṇaṭhānam (sī. syā.)], etaṃ hoti vijānataṃ;
Yadidaṃ bhāvitattānam, ariyānam dhammajīvinam.

“Te jotayanti saddhammam, bhāsayanti pabhaṅkarā;
Ālokarāṇā dhīrā, cakkhumanto raṇaṇjahā.

“Yesam ve sāsanaṃ sutvā, sammadaññāya paṇḍitā;
Jātikkhayamabhiññāya, nāgacchanti punabbhava”’nti.

Ayampi attho vutto bhagavatā, iti me sutanti. Pañcamaṃ.

6. Taṇhuppādasuttam

105. Vuttañhetam bhagavatā, vuttamarahatāti me sutam –

“Cattārome, bhikkhave, taṇhuppādā, yattha bhikkhuno taṇhā uppajjamānā uppajjati. Katame cattāro? Cīvarahetu vā, bhikkhave, bhikkhuno taṇhā uppajjamānā uppajjati; piṇḍapātahetu vā, bhikkhave, bhikkhuno taṇhā uppajjamānā uppajjati; senāsanahetu vā, bhikkhave, bhikkhuno taṇhā uppajjamānā uppajjati; itibhavābhavahetu vā, bhikkhave, bhikkhuno taṇhā uppajjamānā uppajjati. Ime kho, bhikkhave, cattāro taṇhuppādā yattha bhikkhuno taṇhā uppajjamānā uppajjati”’ti. Etamattham bhagavā avoca. Tatthetam iti vuccati –

“Taṇhādutiyo puriso, dīghamaddhāna saṃsaram;

Itthabhāvaññathābhāvaṃ, saṃsāraṃ nātivattati.

“Etamādīnavaṃ ñatvā, taṇhaṃ dukkhassa sambhavaṃ;
Vītataṇho anādāno, sato bhikkhu paribbaje”ti.

Ayampi attho vutto bhagavatā, iti me sutanti. Chaṭṭhaṃ.

7. Sabrahmakasuttaṃ

106. Vuttañhettaṃ bhagavatā, vuttamarahatāti me suttaṃ –

“Sabrahmakāni, bhikkhave, tāni kulāni yesaṃ puttānaṃ mātāpitaro ajjhāgāre pūjitā honti. Sapubbadevatāni, bhikkhave, tāni kulāni yesaṃ puttānaṃ mātāpitaro ajjhāgāre pūjitā honti. Sapubbācariyakāni, bhikkhave, tāni kulāni yesaṃ puttānaṃ mātāpitaro ajjhāgāre pūjitā honti. Sāhuneyyakāni, bhikkhave, tāni kulāni yesaṃ puttānaṃ mātāpitaro ajjhāgāre pūjitā honti.

““Brahmā”ti, bhikkhave, mātāpitūnaṃ etaṃ adhivacanaṃ. ‘Pubbadevatā’ti, bhikkhave, mātāpitūnaṃ etaṃ adhivacanaṃ. ‘Pubbācariyā’ti, bhikkhave, mātāpitūnaṃ etaṃ adhivacanaṃ. ‘Āhuneyyā’ti, bhikkhave, mātāpitūnaṃ etaṃ adhivacanaṃ. Taṃ kissa hetu? Bahukārā, bhikkhave, mātāpitaro puttānaṃ āpādakā posakā imassa lokassa dassetāro”ti. Etamatthaṃ bhagavā avoca. Tatthettaṃ iti vuccati –

“Brahmāti mātāpitaro, pubbācariyāti vuccare;
Āhuneyyā ca puttānaṃ, pajāya anukampakā.

“Tasmā hi ne namasseyya, sakkareyya ca paṇḍito;
Annena atha pānena, vatthena sayanena ca;
Ucchādanena nhāpanena [nahāpanena (sī.)], pādānaṃ dhovanena ca.

“Tāya naṃ pāricariyāya, mātāpitūsu paṇḍitā;
Idheva naṃ pasaṃsanti, pecca sagge pamodaṭī”ti.

Ayampi attho vutto bhagavatā, iti me sutanti. Sattamaṃ.

8. Bahukārasuttaṃ

107. Vuttañhettaṃ bhagavatā, vuttamarahatāti me suttaṃ –

“Bahukārā [bahūpakārā (sī. pī.)], bhikkhave, brāhmaṇagahapatikā tumhākaṃ ye vo [ye te (sabbattha)] paccupaṭṭhitā cīvarapiṇḍapātasenāsanagilānapaccayabhesajjaparikkhārehi. Tumhepi, bhikkhave, bahukārā brāhmaṇagahapatikānaṃ yaṃ [ye (?)] nesaṃ dhammaṃ desetha ādikalyāṇaṃ majjhakalyāṇaṃ pariyośanakalyāṇaṃ sātthaṃ sabyañjanaṃ, kevalaparipuṇṇaṃ parisuddhaṃ brahmacariyaṃ pakāsetha. Evamidamaṃ, bhikkhave, aññaṃaññaṃ nissāya brahmacariyaṃ vussati oghassa nittharaṇatthāya sammā dukkhassa antakiriyyāyā”ti. Etamatthaṃ bhagavā avoca. Tatthettaṃ iti vuccati –

“Sāgārā anagārā ca, ubho aññaññanissitā;
Ārādhayanti saddhammaṃ, yogakkhemaṃ anuttaraṃ.

“Sāgāresu ca cīvaraṃ, paccayaṃ sayanānaṃ;
Anagārā paṭicchanti, parissayavinodanaṃ.

“Sugataṃ [puggalaṃ (sī. ka.)] pana nissāya, gahaṭṭhā gharamesino;
Saddahānā arahataṃ, ariyapaññāya jhāyino.

“Idha dhammaṃ caritvāna, maggaṃ sugatigāmināṃ;
Nandino devalokasmiṃ, modanti kāmakāmino”’ti.

Ayampi attho vutto bhagavatā, iti me sutanti. Aṭṭhamaṃ.

9. Kuhasuttaṃ

108. Vuttañhettaṃ bhagavatā, vuttamarahatāti me suttaṃ –

“Ye keci, bhikkhave, bhikkhū kuhā thaddhā lapā siṅgī unnaḷā asamāhitā, na me te, bhikkhave, bhikkhū māmakā. Apagatā ca te, bhikkhave, bhikkhū imasmā dhammavinayā; na ca te [na ca te bhikkhave bhikkhū (sī. pī. ka.)] imasmiṃ dhammavinaye vuddhiṃ virūḷhiṃ vepullaṃ āpajjanti. Ye ca kho, bhikkhave, bhikkhū nikkuhā nillapā dhīrā atthaddhā susamāhitā, te kho me, bhikkhave, bhikkhū māmakā. Anapagatā ca te, bhikkhave, bhikkhū imasmā dhammavinayā; te ca imasmiṃ dhammavinaye [imasmiṃ ca te dhammavinaye (syā.), te bhikkhave bhikkhū imasmiṃ dhammavinaye (ka.)] vuddhiṃ virūḷhiṃ vepullaṃ āpajjanti”’ti. Etamatthaṃ bhagavā avoca. Tatthettaṃ iti vuccati –

“Kuhā thaddhā lapā siṅgī, unnaḷā asamāhitā;
Na te dhamme virūhanti, sammāsambuddhadesite.

“Nikkuhā nillapā dhīrā, atthaddhā susamāhitā;
Te ve dhamme virūhanti, sammāsambuddhadesite”’ti.

Ayampi attho vutto bhagavatā, iti me sutanti. Navamaṃ.

10. Nadīsotasuttaṃ

109. Vuttañhettaṃ bhagavatā, vuttamarahatāti me suttaṃ –

“Seyyathāpi, bhikkhave, puriso nadiyā sotena ovuyheyya piyarūpasātarūpena. Tamenāṃ cakkhumā puriso tīre ṭhito disvā evaṃ vadeyya – ‘kiñcāpi kho tvamaṃ, ambho purisa, nadiyā sotena ovuyhasi piyarūpasātarūpena, atthi cettha heṭṭhā rahado saūmi sāvaṭṭo sagaho sarakkhaso yaṃ tvamaṃ, ambho purisa, rahadaṃ pāpuṇitvā maraṇaṃ vā nigacchasi maraṇamattaṃ vā dukkha’nti. Atha kho so, bhikkhave, puriso tassa purisassa saddaṃ sutvā hatthehi ca pādehi ca paṭisotaṃ vāyameyya.

“Upamā kho me ayaṃ, bhikkhave, katā atthassa viññāpanāya. Ayaṃ cettha [ayaṃ cevetha (syā.)] attho – ‘nadiyā soto’ti kho, bhikkhave, taṇhāyetaṃ adhivacanaṃ.

“‘Piyarūpaṃ satarūpa’nti kho, bhikkhave, channaṃ ajjhattikānaṃ āyatanānaṃ adhivacanaṃ.

“‘Heṭṭhā rahado’nti kho, bhikkhave, pañcanaṃ orambhāgiyānaṃ saṃyojanānaṃ adhivacanaṃ;

“‘Ūmibhaya’nti kho [sañimīti kho (bahūsu)], bhikkhave, kodhupāyāsassettaṃ adhivacanaṃ;

“‘Āvaṭṭa’nti kho [sāvaṭṭoti kho (bahūsu)], bhikkhave, pañcannaṃ kāmaguṇānaṃ adhivacanaṃ;

“‘Gaharakkhaso’nti kho [sagaho sarakkhasoti kho (bahūsu)], bhikkhave, mātuḡāmassettaṃ adhivacanaṃ;

“Paṭisoto’ti kho, bhikkhave, nekkhammassetaṃ adhivacanaṃ;
 “Hatthehi ca pādehi ca vāyāmo’ti kho, bhikkhave, vīriyārambhassetaṃ adhivacanaṃ;

“Cakkhumā puriso tīre ṭhitoti kho, bhikkhave, tathāgatassetāṃ adhivacanaṃ arahato sammāsambuddhassā’”ti. Etamatthaṃ bhagavā avoca. Tatthetaṃ iti vuccati –

“Sahāpi dukkhena jaheyya kāme, yogakkhemaṃ āyatimaṃ patthayāno;
 Sammappaṇāno suvimuttacitto, vimuttiyā phassaye tatha tatha;
 Sa vedagū vūsitabrahmacariyo, lokantaḡū pāragatoti vuccati’”ti.

Ayampi attho vutto bhagavatā, iti me sutanti. Dasamaṃ.

11. Carasuttaṃ

110. Vuttañhetāṃ bhagavatā, vuttamarahatāti me sutāṃ –

“Carato cepi, bhikkhave, bhikkhuno uppajjati kāmavitakko vā byāpādavitaḡko vā vihiṃsāvitakko vā. Tañce, bhikkhave, bhikkhu adhivāseti nappajahati na vinodeti na byantīkaroti [byantīkaroti (sī. pī.), byantaṃ karoti (ka.)] anabhāvaṃ gameti. Carampi, bhikkhave, bhikkhu evaṃbhūto anātāpī anottāpī [anottāpī (sabbattha) dukanipāte, aṅguttare 1.4.11 passitabbam] satataṃ samitaṃ kusīto hīnavīriyoti vuccati.

“Ṭhitassa cepi, bhikkhave, bhikkhuno uppajjati kāmavitakko vā byāpādavitaḡko vā vihiṃsāvitakko vā. Tañce, bhikkhave, bhikkhu adhivāseti nappajahati na vinodeti na byantīkaroti na anabhāvaṃ gameti. Ṭhitopi, bhikkhave, bhikkhu evaṃbhūto anātāpī anottāpī satataṃ samitaṃ kusīto hīnavīriyoti vuccati.

“Nisinnassa cepi, bhikkhave, bhikkhuno uppajjati kāmavitakko vā byāpādavitaḡko vā vihiṃsāvitakko vā. Tañce, bhikkhave, bhikkhu adhivāseti nappajahati na vinodeti na byantīkaroti na anabhāvaṃ gameti. Nisinnopi, bhikkhave, bhikkhu evaṃbhūto anātāpī anottāpī satataṃ samitaṃ kusīto hīnavīriyoti vuccati.

“Sayānassa cepi, bhikkhave, bhikkhuno jāgarassa uppajjati kāmavitakko vā byāpādavitaḡko vā vihiṃsāvitakko vā. Tañce, bhikkhave, bhikkhu adhivāseti nappajahati na vinodeti na byantīkaroti na anabhāvaṃ gameti. Sayānopi, bhikkhave, bhikkhu jāgaro evaṃbhūto anātāpī anottāpī satataṃ samitaṃ kusīto hīnavīriyoti vuccati.

“Carato cepi, bhikkhave, bhikkhuno uppajjati kāmavitakko vā byāpādavitaḡko vā vihiṃsāvitakko vā. Tañce, bhikkhave, bhikkhu nādhivāseti pajahati vinodeti byantīkaroti anabhāvaṃ gameti. Carampi, bhikkhave, bhikkhu evaṃbhūto ātāpī ottāpī [ottāpī (sabbattha)] satataṃ samitaṃ āradhaviṃriyo pahitattoti vuccati.

“Ṭhitassa cepi, bhikkhave, bhikkhuno uppajjati kāmavitakko vā byāpādavitaḡko vā vihiṃsāvitakko vā. Tañce, bhikkhave, bhikkhu nādhivāseti pajahati vinodeti byantīkaroti anabhāvaṃ gameti. Ṭhitopi, bhikkhave, bhikkhu evaṃbhūto ātāpī ottāpī satataṃ samitaṃ āradhaviṃriyo pahitattoti vuccati.

“Nisinnassa cepi, bhikkhave, bhikkhuno uppajjati kāmavitakko vā byāpādavitaḡko vā vihiṃsāvitakko vā. Tañce, bhikkhave, bhikkhu nādhivāseti pajahati vinodeti byantīkaroti anabhāvaṃ gameti. Nisinnopi, bhikkhave, bhikkhu evaṃbhūto ātāpī ottāpī satataṃ samitaṃ āradhaviṃriyo pahitattoti vuccati.

“Sayānassa cepi, bhikkhave, bhikkhuno jāgarassa uppajjati kāmavitakko vā byāpādavitaḡko vā

vihimsāvitakko vā. Tañce, bhikkhave, bhikkhu nādhivāseti pajahati vinodeti byantīkaroti anabhāvaṃ gameti. Sayānopi, bhikkhave, bhikkhu jāgaro evaṃbhūto ātāpī ottāpī satataṃ samitaṃ āraddhavīriyo pahitattoti vuccati”ti. Etamatthaṃ bhagavā avoca. Tatthetaṃ iti vuccati –

“Caraṃ vā yadi vā tiṭṭhaṃ, nisinno uda vā sayamaṃ;
Yo vitakkaṃ vitakketi, pāpakaṃ gehanissitaṃ.

“Kummaggaṃ paṭipanno [kummaggapaṭipanno (a. ni. 4.11)] so, mohaneyyesu mucchito;
Abhabbo tādiso bhikkhu, phuṭṭhuṃ sambodhimuttamaṃ.

“Yo ca caraṃ vā tiṭṭhaṃ vā [yo caraṃ vā yadi vā tiṭṭhaṃ (syā.), yo caraṃ vātha tiṭṭhaṃ vā (sī. ka.)], nisinno uda vā sayamaṃ;
Vitakkaṃ samayitvāna, vitakkūpasame rato;
Bhabbo so tādiso bhikkhu, phuṭṭhuṃ sambodhimuttama”nti.

Ayampi attho vutto bhagavatā, iti me sutanti. Ekādasamaṃ.

12. Sampannasīlasuttaṃ

111. Vuttañhettaṃ bhagavatā, vuttamarahatāti me suttaṃ –

“Sampannasīlā, bhikkhave, viharatha [hotha (syā.)] sampannapātimokkhā;
pātimokkhasaṃvarasaṃvutā viharatha ācāragocarasampannā aṇumattesu vajjesu bhayadassāvino;
samādāya sikkhatha sikkhāpadesu.

“Sampannasīlānaṃ vo, bhikkhave, viharataṃ [bhavataṃ (syā.)] sampannapātimokkhānaṃ
pātimokkhasaṃvarasaṃvutānaṃ viharataṃ ācāragocarasampannānaṃ aṇumattesu vajjesu
bhayadassāvīnaṃ samādāya sikkhataṃ sikkhāpadesu kimassa uttari karaṇīyaṃ [kimassa bhikkhave
uttari karaṇīyaṃ (sabbattha)]?

“Carato cepi, bhikkhave, bhikkhuno [abhijjhā byāpādo vigato (a. ni. 4.12) aṭṭhakathāya sameti]
bhijjhā vigatā [abhijjhā byāpādo vigato (a. ni. 4.12) aṭṭhakathāya sameti] hoti, byāpādo vigato hoti
[thinamiddhaṃ uddhaccakukkuccaṃ vicikicchā (a. ni. 4.12)], thinamiddhaṃ vigataṃ hoti,
uddhaccakukkuccaṃ vigataṃ hoti, vicikicchā [thinamiddhaṃ uddhaccakukkuccaṃ vicikiccā (a. ni.
4.12)] pahīnā hoti, āraddhaṃ hoti vīriyaṃ asallīnaṃ, upaṭṭhitā sati asammuṭṭhā [appamuṭṭhā (syā.)],
passaddho kāyo asāraddho, samāhitaṃ cittaṃ ekaggaṃ. Carampi, bhikkhave, bhikkhu evaṃbhūto ātāpī
ottāpī satataṃ samitaṃ āraddhavīriyo pahitattoti vuccati.

“Ṭhitassa cepi, bhikkhave, bhikkhuno abhijjhā vigatā hoti byāpādo...pe... thinamiddhaṃ...
uddhaccakukkuccaṃ... vicikicchā pahīnā hoti, āraddhaṃ hoti vīriyaṃ asallīnaṃ, upaṭṭhitā sati
asammuṭṭhā, passaddho kāyo asāraddho, samāhitaṃ cittaṃ ekaggaṃ. Ṭhitopi, bhikkhave, bhikkhu
evaṃbhūto ātāpī ottāpī satataṃ samitaṃ āraddhavīriyo pahitattoti vuccati.

“Nisinnassa cepi, bhikkhave, bhikkhuno abhijjhā vigatā hoti, byāpādo...pe... thinamiddhaṃ...
uddhaccakukkuccaṃ... vicikicchā pahīnā hoti, āraddhaṃ hoti vīriyaṃ asallīnaṃ, upaṭṭhitā sati
asammuṭṭhā, passaddho kāyo asāraddho, samāhitaṃ cittaṃ ekaggaṃ. Nisinnopi, bhikkhave, bhikkhu
evaṃbhūto ātāpī ottāpī satataṃ samitaṃ āraddhavīriyo pahitattoti vuccati.

“Sayānassa cepi, bhikkhave, bhikkhuno jāgarassa abhijjhā vigatā hoti byāpādo...pe...
thinamiddhaṃ... uddhaccakukkuccaṃ... vicikicchā pahīnā hoti, āraddhaṃ hoti vīriyaṃ asallīnaṃ,
upaṭṭhitā sati asammuṭṭhā, passaddho kāyo asāraddho, samāhitaṃ cittaṃ ekaggaṃ. Sayānopi, bhikkhave,

bhikkhu jāgāro evaṃbhūto ātāpī ottāpī satataṃ samitaṃ āradhāvīriyo pahitattoti vuccatī’ ti.
Etamatthaṃ bhagavā avoca. Tatthetaṃ iti vuccati –

“Yataṃ care yataṃ tiṭṭhe, yataṃ acche yataṃ saye;
Yataṃ samiñjaye [samiñjaye (sī. syā.)] bhikkhu, yatameṇaṃ pasāraye.

“Uddhaṃ tiriyaṃ apācīnaṃ, yāvātā jagato gati;
Samavekkhitā ca dhammānaṃ, khandhānaṃ udayabbayaṃ.

“Evaṃ vihārimātāpim, santavuttimanuddhataṃ;
Cetosamathasāmīcim, sikkhamānaṃ sadā sataṃ;
Satataṃ pahitattoti, āhu bhikkhuṃ tathāvidha’ nti.

Ayampi attho vutto bhagavatā, iti me sutanti. Dvādasamaṃ.

13. Lokasuttaṃ

112. Vuttañhettaṃ bhagavatā, vuttamarahatāti me suttaṃ –

“Loko, bhikkhave, tathāgatena abhisambuddho: lokasmā tathāgato viṣaṃyutto. Lokasamudayo, bhikkhave, tathāgatena abhisambuddho: lokasamudayo tathāgatassa pahīno. Lokanirodho, bhikkhave, tathāgatena abhisambuddho: lokanirodho tathāgatassa sacchikato. Lokanirodhagāminī paṭipadā, bhikkhave, tathāgatena abhisambuddhā: lokanirodhagāminī paṭipadā tathāgatassa bhāvitā.

“Yaṃ, bhikkhave, sadevakassa lokassa samārakassa sabrahmakassa sassamaṇabrāhmaṇiyā pajāya sadevamanussāya diṭṭhaṃ suttaṃ mutaṃ viññātaṃ pattaṃ pariyesitaṃ anuvicaritaṃ manasā yasmā taṃ tathāgatena abhisambuddhaṃ, tasmā tathāgatoti vuccati.

“Yañca, bhikkhave, rattiṃ tathāgato anuttaraṃ sammāsambodhiṃ abhisambujjhati, yañca rattiṃ anupādisesāya nibbānadhātuyā parinibbāyati, yaṃ etasmiṃ antare bhāsati lapati niddisati, sabbaṃ taṃ tatheva hoti no aññathā, tasmā tathāgatoti vuccati.

“Yathāvādī, bhikkhave, tathāgato tathākārī, yathākārī tathāvādī, iti yathāvādī tathākārī yathākārī tathāvādī, tasmā tathāgatoti vuccati.

“Sadevake, bhikkhave, loke samārake sabrahmake sassamaṇabrāhmaṇiyā pajāya sadevamanussāya tathāgato abhibhū anabhibhūto aññadatthudaso vasavattī, tasmā tathāgatoti vuccatī’ ti. Etamatthaṃ bhagavā avoca. Tatthetaṃ iti vuccati –

“Sabbalokaṃ [sabbamaṃ lokaṃ (a. ni. 4.23)] abhiññāya, sabbaloke yathātathaṃ;
Sabbalokaviṣaṃyutto, sabbaloke anūpayo [anusayo (sī.), anupayo (syā.)].

“Sa ve [sabbe (sabbattha) a. ni. 4.23 passitabbaṃ] sabbābhibhū dhīro,
sabbaganthappamocano;
Phuṭṭhāssa paramā santi, nibbānaṃ akutobhayaṃ.

“Esa khīṇāsavo buddho, anīgho chinnaśaṃsayo;
Sabbakammakkhayaṃ patto, vimutto upadhisāṅkhaye.

“Esa so bhagavā buddho, esa sīho anuttaro;

Sadevakassa lokassa, brahmacakkaṃ pavattayi.

“Iti devā manussā ca, ye buddhaṃ saraṇaṃ gatā;
Saṅgama taṃ namassanti, mahantaṃ vītasāraḍaṃ.

“Danto damayataṃ seṭṭho, santo samayataṃ isi;
Mutto mocayataṃ aggo, tiṇṇo tārayataṃ varo.

“Iti hetāṃ namassanti, mahantaṃ vītasāraḍaṃ;
Sadevakasmiṃ lokasmiṃ, natthi te paṭipuggalo”’ti.

Ayampi attho vutto bhagavatā, iti me sutanti. Terasamaṃ.

Catukkanipāto niṭṭhito.

Tassuddānaṃ –

Brāhmaṇasulabhā [brāhmaṇacattāri (sabbattha)] jānaṃ, samaṇasīlā taṇhā brahmā;
Bahukārā kuhapurisā [kuhanā (syā.)], cara sampanna lokena terasāti.

Suttasaṅgaho –

Sattavisekanipātaṃ, dukkaṃ bāvīsasuttasaṅgahitaṃ;
Samapaññāsamathatikaṃ, terasa catukkaṅca iti yamidaṃ.

Dvidasuttarasuttasate, saṅgāyitvā samādahiṃsu purā;
Arahanto ciraṭṭhitiyā, tamāhu nāmena itivuttanti.

Itivuttakapāli niṭṭhitā.